

HEBREOS

Yi Necy Huidi Pinjaty Yajniguejx Je Hebreo jäy

¹ Jecy'ajty Dios ayuc yejcy ma ajt nmij'ap nmijteedy canaag'oc etz canaagnax mïd je yprofetas ajcxy, je' ajcxy huidibi najtzcapxïy Dios y'ayuc. ² E jadachambi ma xï tiempo yhuingooni co je naaxhuiñybi ycixani, Dios ayuc yecy ma ïich ajt mïd je' y'ung. Dios mïd y'ung yaj'oyïy je naaxhuiñybi etz tüg'óciy tijaty huidibi yajpatp. E Dios ti y'ung yajmigo'ixmadziydäy tüg'óciy. ³ Dios y'ung ymïd Dios y'oy'ájtïn, yi' je' Dios ytïcxin'ajtpy yjajïn'ajtpy. Yi' je' codinaayb etz yajniguëxïgy nej je' je Dios. Dios y'ung huijtz'ijtaayb tüg'óciy mïd je' y'ayuc etz ane'mïn mic'ajt mïdpi. Co Dios y'ung ti xyajhuaatzim ajt nbocy, chi cöbijcy je mij'ane'mïn jïiby tzajpjoty, jadu'n nej jihuïy y'ixtacy a'oy'amy ma je mijpï Dios ymïjc jïiby tzajpjoty.

Dios y'ung jacmij yi'ca'ydi ángeles ajcxy

⁴ Je Dios y'ung jac mij je' ymic'ajt y'ane'mïn mïdity, ca'ydi je ángeles ajcxy. Com yi' je' Dios y'ung, paady ycixpi mic'ajt mïdity jaydëbi ane'my huidibi Dios yje'ajtpy, e ca'ydi yi' ángeles ajcxy yi' jadu'mbi mic'ajt mïd. ⁵ Com Dios ca' yi' ni tüg ángel nimay:

ïich miich n'ung'ajtpy. ïich miich ti nyajpi'c'aty jadachambi xï.

Nañ jadu'n ca' Dios ni tüg ángel nimay:

Miich xyteedy'adïbich, ïich miich n'ung'adïyb.

6 Co Dios y'ungoob oy quexy ma naaxhuiñjyäy chinäy, chi yí' ane'min pidacy:

Huen je ángeles ajcxy nidüg'óciy huindzigihuipy pa'tjihuihuipy je' y'ung.

7 E mïd je ángeles ycixpi, Dios ymïna'ñ:

Yí ángeles jadu'n yí' ajcxy nej poj. Yí' ajcxy huidibi tzajpjoty tzinaayb, jadu'n yí'ajcxy nej huidzuc, nej jünye'n.

8 Jadu'n Dios ymïnañ mïd y'ung ycixpi:

Miich, Dios'ajtp, miich m'ane'min huinixi huinitiempo yí' y'idipy. Mïd mdudägy'ajtin miich m'ane'mipy.

9 Ti mdzocy je tiy'ajt tiybi, e ca' ti m'ixa'ñ je jibicpi. Paady ycixpi Dios, miich mDios, ti xyhuin'ixy, e ti yejctäy nīgi ma miich je jotcuje'ajtin je xondaacin, ca'ydi ma yí mmi'ane'mbidijc.

10 Dios nañ jadu'n ymïna'ñ:

Miich, Huindzin Dios, oga'n'aty mbidac nej naaxhuiñybi chondacy, e mïd miich mmic'ajt myaj'oyiy je tzajp.

11 Cijxtähuip yí naaxhuiñybi etz yí tzajp, per miich hui'mip huinixi huinitiempo. Jadu'n yí naaxhuiñybi etz yí tzajp y'amijiydähuipy nej huit.

12 Jadu'n miich yí naaxhuiñybi etz yí tzajp m'anëgipy nej tüg huit yaj'anëgyin. Jadu'n miich yí naaxhuiñybi etz yí tzajp myajtigadzipy nej jäy ajcxy yajtigach yhuit. Chi miich je'ni m'idipy, je mxixi mjimijt ni mina ycacixipy ycatigoyipy.

13 Ni camina Dios canimay ni tüg je ángeles ajcxy:

İña' ma ĩch nmıjc a'oy'amy, ixtı mabaad ĩch
miich je mmıdzip nmımadactäyich, jadu'n
yı'ajcxy nipaadıpy nej yı' miich mdecypocx-
pejt'adyii.

¹⁴ Tüg'ócıy je ángeles ajcxy ac espíritu yı' ajcxy, e
ytungıxy ma Dios, yquexyöygıxy jıgıx pubedıpy je
jäy ajcxy hıdibi ajcxy y'alma padam ñıdzoocın.

2

*Ca' n'ıjxnajx nmıdonajım nıgoo yı pocyhuin-
meecxın*

¹ Mııd jadayaabi tıy'ajt ycıxpi, oy co
yajxon n'ocjäygugııyım Dios ytıy'ajt hıdibi ti
nmıdoohuım, jıgıx ca' nıjpyöyduutım je Dios
ytıy'ajt hıdibi jadu'n nipatp nej tü'aa oybi. ² Pen
je ayuc tıy'ajt hıdibi ángeles ajcxy yejc jecy'ajty,
hui'm je' co yjanchıty. E pinjaty pocytumb, e ca'
cuyduunı Dios ytıy'ajt, Dios chaachytunıpy je'
nej padyii mııd ypocy ycıxpi. ³ ¿Nej tıjy ĩch ajt
co Dios ycastigo nga'ocpaatım, pen je' je' yam
ca' nmıjpıdaacım je Dios ytıy'ajt jadu'n nej jėbi
xyajnıdzoocım ajt n'alma? Yı Huındzın Jesús
jayıjp'aty cı'm nıgapxy Dios ytıy'ajt jadu'n nej
jėbi Dios xyajnıdzoocım ajt n'alma. E jac'axam
je discıpulos ajcxy nañ jadu'n najtzcapxıy Jesús
y'ayuc, e nıgapxpejty ajcxy co yjanchıty je Jesús
y'ayuc, e chi capxnajxy ajcxy jada tıy'ajt ma ĩch
ajt. ⁴ Jadu'n anajty capxhuäcxıxy Jesús y'ayuc
ma ĩch ajt, chi Dios yajnıguëxıcp Jesús y'ayuc co
yjanchıty co tuñ ıxpejt, mıjhuinma'ñ etz milagro.
E co Dios xymooyım je yıhui'ñ ymıc'ajt, chi nıje'
nıje' nbaatım mıc'ajt ma Dios. E jadu'n Dios tuñ
nej yı' tzocy.

Jesucristo jadu'n je' anajty nej ajcxy yjuugy ymigüg

⁵ Dios ca' yi ángeles ajcxy ti cötuycin möy co y'ane'mity ya naaxhuiñ, jadu'n nej xii tiempo min cidägy, je xii je tiempo huidibi ich ajt nnimiydaacim. ⁶ Hue' janchtiy ji tüg'it yjaybetyity ma Dios ñecy, ma ymina'ñ:

Miich Dios, ¿ti yi' je naaxhuiñyäj, co miich yi' ajcxy mjäy medziyb? ¿Ti yi' je naaxhuiñyäj, co miich je' ajcxy mjotmay'adyii?

⁷ Janch con xii tiempo miich ti mmöy yi naaxhuiñyäj ajcxy e nañ ti mmöy jacminacy ymic'ajt y'ane'm'ajt ca'ydi yi ángeles ajcxy. Per jac'axam miich mmöhua'ñ naaxhuiñyäj ajcxy ñigi ymic'ajt y'ane'm'ajt, ca'ydi je ángeles ajcxy. Tüg'óciy huidijaty miich ti myaj'oyiy anajty ti mbidactähuiip yi' ma yi naaxhuiñyäj ajcxy ane'min.

⁸ E co anajty ti mbidactäy anajty ma yi' ajcxy y'ane'min, jadu'n nipaady nej jihuüy tüg'óciy tijaty huidibi ti myaj'oyiy, y'idipy ma yi' ajcxy ytecypa't.

E jadu'n yi', co Dios moyday ane'min je Cristo. Dios ni ti yi' ca'ixmach nicxy yca'ity ma yi' y'ane'min. Oy ixypy ca'ni cham n'ijxim co tüg'óciy tijaty ya naaxhuiñ etz tzajpjoty ca'ni amugi' ycapxycöbigyii. ⁹ Dios ti xyaj'ijxim co Jesús miiid mij'ajt ane'm'ajt. Je ángeles ajcxy ñigi mic'ajt oy'ajt anajty miiidity, ca'ydi Jesús co yi' chinay ya naaxhuiñ. Jadu'n Dios tuñ jaydebí Jesús y'ögy miiid jäy ajcxy ypocy ycixpi. Jadachambi Dios ti

möy Jesús mij oy'ajtin, etz mij ooy ti cömay müd je tzaachy'o'cin huidibi ypaat.

¹⁰ Tüg'óciy huidijaty ya yajpatp, ji'ajtp yi' müd Dios ycixpi etz Dios ymic'ajt yaj'ijtaayb tüg'óciy huidibi ji'ajtp. Dios tudägy ytuun co yajca'pxi Jesucristo y'oy'ajtin müd je tzaachypí huidibi ti minaxy ti yajnaxy. Müd co Jesucristo tzaachypí ti minaxy ti yajnaxy, paady ycixp jäy ajcxy padaangixy Cristo y'oy'ajtin. ¹¹ Müd co Jesucristo, je huidibi jäy ajcxy yajpocyñihuaatzp, jiiy mic'ajt ti paady ma Dios Teedy, paady ycixp yi' ajcxy huidibi patcixp pocyñihuaatzin nañ jim mic'ajt patcixy ma Dios Teedy. E müd co Jesucristo etz yi' yjäy mic'ajt patcixy ma Dios Teedy, paady ycixp Dios y'ung je Jesucristo ca' ti tzo'ydu'n jihuüy co yi' ymina'n co je mibijcpidijc jadu'n nipaady nej yi' yjugytijc ymigügtijc. ¹² Paady je Cristo ymina'n ma yjaybetyity:

Miich Dios, iich miich ngapxpadipyich ma nmigügtijcich. N'iihuipyich iy müd miich ycixpi ma je jäy ajcxy ti nayyöymüjcigixy.

¹³ Nañ jadu'n Cristo ymina'n ma yjaybetyity:

Nmijpidägiyich Dios.

E jadüg'oc yminaani:

Cha iich, müd je ung anäg ajcxy tiibi Dios xymöyich.

¹⁴ Ma jäy ajcxy ytügquëx'ajtcixy, tügpí yxiixy, tügpí ni'py je' ajcxy. Nañ jadu'n Jesús ymüid je' anajty yxiixy ñi'py jadu'n nej jäy ajcxy ymüidity jigix jëbi y'ögy, e jadu'n je' yajhuindigoydähuipy je huidibi anajty jamic'ajtmüid co jäy yaj'ögüyb, je' je' je mujcu'. ¹⁵ E jadu'n je Cristo yajnihuädzictuty

tüg'óciy pinjaty anajty cojuyïy codoogïy y'ijtp ma je mujcu', mïid co tzigïygïxy yi y'o'cin. ¹⁶ Janch co Jesús ymiiñ ya naaxhuiñ, ca' nminaanim co pubeda'ñ je ángeles ajcxy, je' janchtiy ypubedamyb Abraham y'ap y'oc. ¹⁷ E mïid jada ycïxpï, Jesucristo jadu'n anajty mïidity ñinïcx etz yjugy'ajtin tú'ciy mïid je jugytïjc ymïgügtïjc ninïcx etz jugy'ajtin, jigïx jëbi yi' naydügpajc codinäy naaxhuiñyäjy ajcxy ma Dios yhuinduu mïid tudägy'ajt etz pa'ayoohuin. Etz nañ jadu'n jigïx jëbi huindzigïy Dios mïid yci'm ñinïcx mïid jäy ajcxy ypocy ycïxpï, e jadu'n ya-jpocyhuaatztähuip yi mayjäy ajcxy. ¹⁸ Com Jesucristo ci'm tzaachypï minajx yajnajx, etz nañ jadu'n je mujcu' Jesucristo jot'ijxy huinma'ñ'ijxy, paady ycïxp Jesucristo jëbi pubety pinjaty jadu'n tzaachypï minajxp yajnajxp, etz ma yjot'ixyii yhuinma'ñ'ixyii je mujcu'.

3

Jesús jacnïgi mijity yi' ca'ydi Moisés

¹ Mïid co Jesucristo jadu'n ti tuñ, paady ycïxp miich ajcxy migügtïjc huidibi cïxyjot huiniñot mijpidacp Jesucristo, je huidibi ajcxy Dios ti xyhuin'ijxcïxy co xyje'adäänigïxy. Pidaaccix mhuinma'ñ yajxon ma je Cristo Jesús, je huidibi nejhuïyïm co Dios ti quexy ya naaxhuiñ, je huidibi tügpajc mïjtungmïid ma Dios, huidibi tügpajc xycodinaayïm ma Dios. ² Jesús tudägy yi' ti y'ity ma Dios yhuinduu, je Dios huidibi ti yajnïbigyïi je mïjtung, tim jadu'n nej Moisés y'ijty tudägy ma je ytung mïid tüg'óciy jäy huidibi anajty ti cöbijccïxy Dios ycötujcïn ma Moisés. ³ Jesús

ymihuaad nīgi huindzigi'ñ etz cōmayin, ca'ydi Moisés. Tim jadu'n nej pin tūg tijccojpi je' je' ijtp cōmay, ca' nmīnaanīm je tijc ijtp cōmay. ⁴ Tūg tūg tijc jīm je' pin cojp. Per Dios yī' ti yajcojtāy yaj'oyīdāy tūg'óciy huīdībī jī'ajtp. ⁵ E jadu'n je Moisés tudāgy je' ytuuñ mīd tūg'óciy jāy huīdībī ti paady Dios ycōtujcīn ma yī'. Je Moisés je' ytung'ajti yejcy je tiy'ajt huīdībī anajty Dios jac'axam yegamyb. ⁶ Je Cristo tudāgy ytuñ mīd tūg'óciy īich ajt huīdībī mijpīdacp Dios, tim jadu'n nej tūg jāy y'ung tudāgy ytuñ ma yteedy ytīc yteedy ypīdāgy. Jadu'n īich ajt nbaady nej Dios ytīc, e Cristo tudāgy ytuñ mīd īich ajt, pen tudāgy nmībījcīm Dios y'ayuc, ca' n'ixmajtzm ajt nmībījcīn. Pen nmījpīdaacīm Dios agujc jotcujc ixtī mabaad n'o'cīm mīd je' ycīxpi huīdībī njījp'ijxīm ma Dios.

Dios yjāy ajcxy ypooocxīn

⁷ Paady ycīxp jadu'n yjaybetyity ma Dios ñecy ma je Espīritu Santo jadu'n ymīnañ:

Jadachambī pen mīdooyb mīich ajcxy nej Dios ymīna'ñ,

⁸ ca' ajcxy m'ijtcīxy jotjuuñ jadu'n nej je' anajty ajcxy jotjuuñ y'ity, je' ajcxy huīdībī mībīdīgy Dios jecy'ajt (co ajcxy y'ijty jīm mījtiḡīduum). Je xī je tiempo jecy'ajty co ajcxy jot'ijxy huīnma'ñ'ijxy Dios.

⁹ Chi Dios ymīna'ñ:

Mīich ajcxy mmīj'ap mmījteedy ajcxy jīm mījtiḡīduum xyjot'ijx xyhuīnma'ñ'y'ijxīch ajcxy jecy'ajty. Ca' ajcxy jāymech co ajcxy y'ijxy anajty canaag mījhuīnma'ñ huīdībī

ndumybich anajty m̃id yi' ajcxy ycixpi
huixchiguïpx j̃im̃ijt.

10 Paady njotma'tyich m̃id miich ajcxy mm̃ij'ap
mm̃ijteedy jecy'ajty, e nm̃inaañich:
“Ñidigoy t̃udigoy ajcxy jabom jabom
ma yjot yhuinma'ñ. E ca' ajcxy
nejhuĩhuaangixy anajty ñch nñi'aa ndü'aa.”

11 Paady yi' ajcxy nm̃ijotma'tyich, e janch janch
nñimaayich ajcxy, e ca' n'ñdägyich, co ca'
ajcxy ytig̃ihuipy ma ñch nbocxtac.

12 Mig̃ügtjc, nayg̃üend'ajt̃igix nidüg nidüg co
ni t̃üg miich ajcxy mgam̃id'adip jibicjot jibic-
huinma'ñ, e ni m̃ga'ixm̃ajtzcixipy Dios juugypi
y'ayuc, m̃id co ca' mm̃ibijccixy. 13 Hue' janchtiy
nayjot'am̃ijm̃óoyigixy miñ xyipy jabom jabom
nam̃i x̃i tiempo yjacñcxñi. Jadu'n miich ajcxy
mdunipy, ca'yd̃i ajcxy yi pocyuñi xyhuin'ñgixy,
e chi anajty mnaybidáacigixy jotjuuñ. 14 Pen
nm̃ibijc̃im nm̃ijpidaac̃im Cristo y'ayuc t̃ibi
nbaatim oga'n'aty, e ca' n'ixtig̃ihua'c̃im mabaad
n'o'c̃im, chi j̃ebi n'ij̃tim m̃id Cristo.

15 Je' je' je huidibi jaybetyity ma Dios y'ayuc:
Cham, pen mm̃idooyb miich ajcxy nej Dios
ym̃ina'ñ, ca' ajcxy m'ijtcixy jotjuuñ, jadu'n
nej je' anajty ajcxy huidibi Dios mijotma'tp
anajty m̃id co ajcxy m̃ibid̃gy Dios.

16 ¿Pinjaty ajcxy huidibi jecy'ajty m̃idou Dios
y'ayuc e m̃ibid̃gy Dios? Nidüg'óc̃iy je' ajcxy
huidibi tzomb Egipto naaxjot jecy'ajty m̃id
Moisés. 17 ¿Pinjaty je Dios ym̃ijotma't jadu'n
huixchiguïpx j̃im̃ijt? Je huidijaty ajcxy tundigoy
m̃id Dios ytiy'ajt, e je' ajcxy cijx y'öctaaygixy

jim migtig'iduum. ¹⁸ ¿Pinjaty Dios ñimay co ni camina ytigihuipy ma je Dios y'it ylugar ma jëbi ypoocxcixy mïid yí? Je' ajcxy huidibi ca' ycapxymïdoy. ¹⁹ Paady nnejhuïyim co janch ca' ajcxy jajty nej ytigïygixyipy ma Dios y'it ylugar mïid co ajcxy ca' mibijcy Dios y'ayuc.

4

¹ Com nmïidni ajt Dios y'ayuc, jadu'n nej ti xyaj'ahuaniïyim co ndigïïyim ma yí' chinaydac yjugy'ajttac, e nboocxim mïid yí'. Paady ooy tzocy co ndzigïïyim Dios. Ca' jecyity co nidüg miich ajcxy ca' mdigïhuipy mïid co ca' mmibijccixy Dios y'ayuc.

² Nañ jadu'n ti ñich ajt nmïdoohuim je Dios y'ayuc oybi, tim jadu'n nej yí' ajcxy jecy'ajty ti mïdooy. Per ca' Dios y'ayuc ma ti ypubedyii ajcxy co ti jamïdoogixy je tiy'ajt. Com hue' ajcxy ymïdou, e ca' ajcxy mijpidacy. ³ ñich ajt com ti nmibijcïm je Dios y'ayuc oybi, ñich ajt je' tigïïyimip ma je it huidibi Dios ti tijy ma jëbi nboocxim mïid yí'. Com Dios jadu'n ymïnañ:

Paady yí' ajcxy nmïjotma'tyich, e nnimäyich ajcxy, n'ïbaadyich ngapxpaadyich n'ayuc, co ni camina xï yí' ajcxy ypocxtac capaadipy ma ñich.

Tüg'óciy huidibi Dios yajcojy yaj'oyïy, hue' ti yajcojy ti yaj'oyïy jayïpni ca'ni anajty naaxhuiñybi chondacy. ⁴ Com ma yjaybetyity je tiy'ajt jïlby muumity nigapxy je mihuixtujcxïbi ma jadu'n ymïnañ:

Dios ypoocxy je mihuixtujcxïbi mïid je' ytung ycixpi tiibi anajty tuñ.

⁵ E jadüg it yjaybetyity ma Dios ñecy ma jadu'n yminañ:

Ca'p yi' ajcxy ytigiygixipy ma ich nbocxtac.

⁶ Hue' janchtiy Dios yjacmüd'ajtyñi it lugar ma ypocxtac ma jëbi pinjaty ytigihuip. Yi' ajcxy huidibi tzinay jecy'ajty huidibi jayip midou Dios y'ayuc, ca' je' ajcxy ytigiy ma Dios ypocxtac, müd co ajcxy capxycömidoodacy Dios. ⁷ Paady ycixpi Dios ti pidägy tüg xii tüg tiempo mina jëbi pinjaty tigihuipy ma yi' ypocxtac. Je' jadachambi xii tiempo Dios ti pidägy. Dios ti xynimaayim nej David yminañ tzach com jecy, nej miiñ jaybety huidibi ti yajni-gapxy co jadu'n yminañ:

Jadachambi pen midooyb miich ajcxy nej Dios yminañ, ca' ajcxy mnaybidáacigixy jotjuuñ.

⁸ Co Josué je Israel jäy ajcxy camoy je poocxin, ca' Dios canigapxy huingbi xii mina ytigihuañ ajcxy ma Dios ypocxtac. ⁹ Paady ycixp, jadu'n yjac-hui'myñi jadüg xii tiempo mina Dios yjäy ytigihuañ ma Dios ypocxtac. ¹⁰ Com pinjaty tigiyb ma Dios ypocxtac hue' je' ypocxy müd je' ytung ycixpi tiibi anajty tuñ, tim jadu'n nej Dios ypocxy je mihuixtujcxibi müd je' ytung ycixpi tiibi anajty tuñ. ¹¹ Hue' tzocy co naymic'ijxim nej huaad ndigiyim ma je Dios ypocxtac, ca' yjecyity co nijëjity miich ajcxy mbaduunipy nej ajcxy y'idich huidibi ajcxy ca' mibijcy Dios y'ayuc, e ca' mdigiygixipy ma Dios ypocxtac.

¹² Com yi' Dios y'ayuc ijtp yi' huinixii huinitempo, e ymüd mic'ajt. Nigi yajtigiyñajxtäy ninicx, jot almi, ca'ydi tüg espada huidibi mejtz'adu'm'amy jipip etz yjipxuñity. E Dios

y'ayuc nejhuiydaayb nej jäy ajcxy yjot yhuinma'ñ miiidity, e tüg'óciy tijaty ajcxy ñijot'ajtcixyp. ¹³ Ca' ji ni ti huidibi Dios ti yajcojy nicxy ñayyüchyii ma yi' yhuinduu. Tüg'óciy nej ajt njot nhuinma'ñ nmiiidity ñiguëxictähuiip yi' ma Dios, je Dios ma iich ajt nguendi ngi'yegaanim, yi' ijxtaayb ajt njot nhuinma'ñ.

Jesús yi' je' je mihuingapxpi ma Dios

¹⁴ Jesús, je Dios y'ung, yi' je' tügpajc jacmijtungmiiid huidibi xycodinaayim ma Dios miiid ajt nbocy ycixpi. E Jesús ti ytigüy ma Dios yhuinduu, paady ycixp tzoc ijtim tudägy ma ajt nmibijcin. ¹⁵ Pues com Jesucristo, je huidibi tügpajc mijtungmiiidip ma Dios, je huidibi xycodinaayim etz xyhuingapxim ma Dios, com Cristo tzaachypi etz ijxta'ni canaagnax ti yajnaxy, tim jadu'n nej iich ajt tzaachypi etz ijxta'ni nyajnajxim, per je' ca' ma ti bocy tuuñ. Paady ycixpi jëbi Cristo ajt xypa'ayoohuim co ajt nyajnajxim tzaachypi etz ijxta'ni. ¹⁶ Tzoc agujc jotcujc nmihuingoonim je Dios y'ane'mdac e n'ojadajtim nmibijctzoohuim Dios, jaydëbi co anajty jotmay miiid'ajtim, chi Dios may'ajt oy'ajt tunipy miiid iich ajt ycixpi.

5

¹ Tüg tüg mijtungmiiidpi huidibi huingapxp jäy ajcxy ma Dios, hue' je' yajhuin'ijxp ma yëdijctijc, etz yajnigapxpejty, jaydëbi yhuingapx jäy ajcxy ma Dios etz yajnaxipy Dioscojuyip miiid jäy ajcxy ma Dios, etz yegipy huindzigi'ñ ma Dios miiid jäy ajcxy ypocy ycixpi. ² Je mijtungmiiidpi jäy ajcxy yajnibijc huidibi huingapxp jäy ajcxy ma Dios, jëbi yi' ajcxy

pa'ayooy huenpinity huídibi pocy ymíid, com nañ jadu'n yí' ajcxy pocy jihuĩy. ³ E míid yci'mbocy ycixpi copicy yegipy huindzigi'ñ ma Dios etz míid jacjadyii jáy ajcxy ypocy ycixpi.

⁴ Ni pin huaad ci'm ycanaymöyii je jadu'mbi tung co yhuingapxity ma Dios. Dios yhuin'ijxpy pinjaty huingapxip ma yí' míid jáy ajcxy ycixpi, tim jadu'n nej Dios huin'ijxy Aaron jecy'ajty etz yajnibijcy yí' jadu'mbi tung. ⁵ Jadu'n yjajty míid je Cristo, ca' ci'm nayñibijctzoohuĩy ma yí' jadu'mbi tung. Dios yajnibijci co huingapxip míid jáy ajcxy ycixpi, e ti ymöyii je mij'ajt jadu'n nej anajty ti nimáy:

Miich je' ich n'ung. Ich miich mjugy'ajt ti mmöy cham.

⁶ Nañ jadu'n ymina'ñ jadüg'it ma Dios ñecy:

Miich je' mhuingapxyp je jáy ajcxy ma Dios huinixi huinitioempo, tim jadu'n nej Melquisedec ytuuñ.

⁷ Co Cristo chinay ya naaxhuiñ, chi ooy mijuydágy minucxtägy Dios, chi ooy mibijctzoy janch mic je Dios huídibi jëbi ycohua'ñyii ma je o'cin. Míid co ooy mibijcy ooy huindzigiyy Dios míid yung naxy yjot yhuinma'ñ, paady Dios ymidoohui.

⁸ Je Cristo oy je' anajty Dios ja'ung'adyii, yjajti nej ycapxymidoohuipy Dios, míid je' ycixpi nej anajty ti y'ayoy ya naaxhuiñ. ⁹ Co Cristo ya-jca'pxy yí' y'oy'ajtin míid je tzaachypi huídibi yminajxy yajnajxy, chi ni'ixi' anajty y'ity jëbi cop'adyii alma nídzoocin huinixi, jaydëbi tüg'óciy pinjaty capxymidoob Cristo, ypaadip ajcxy y'alma nídzoocin. ¹⁰ Dios jadu'n yajnibijcy Jesús co yajnicxip je jac mijpi tung ma yí' co huingapxip jáy

ajcxy ma Dios, tim jadu'n nej Melquisedec ytuñ jecy'ajty.

Je ayo'n co njjpyöyduutim yi mibijcin

¹¹ Ooy ñch miich ajcxy mij nmñdmıydäga'ñ ma jadayaabi tiy'ajt, per ooy chachchip nimıydaacnıty, com ca' miich ajcxy mıc'amy mhuinijihuıhuıpy Dios ytiy'ajt. ¹² Jadu'n nej jada xıı tiempo ti yjejcni ma miich ajcxy oga'n ti mmıbıcy. Hue' miich ixııpy ajcxy mniyaj'ixpijcnıp Jesucristo ytiy'ajt je tzipjatypi. Per miich ajcxy mdzojcyñi co myajnajtzcapxiıhuıpy huinjemy je Dios y'ayuc huıdibi ca' chipıty. Ti miich ajcxy m'ahuımbıjttaaygıxy ca' mıc majaa ma mmıbıjcin. Hue' jeyi miich ajcxy jadu'n nıpaady nej pi'ctıjc huıdibi leche uucp, e ca' jadu'n paady nej mij'anäctıjc huıdibi caagy caayb. ¹³ Pinjaty yajpatp ma jada ixpijcin huıdibi ca' chipıty, jadu'n yi' nej ma'xungdıjc com ca' jajtcıxy je ayuc tiy'ajt tiybi. ¹⁴ Je' tzipjatpyi tiy'ajt je je' winjiıhuıygıxp, je' huıdibi ymıbıjkin mij may mıd'ajtkıxpın, jıdu'n nej je' huıdibi y'aa ytıtz jım ajkıxyın je' tıtzpi jıch kaagy je' ykaaygıxpy, je' ko yjajtkıxpy je' nej winjiwııygıxıchın je' huıdibi oy, etz je' huıdibi ka'oyın.

6

¹ Paady tzoc nıgi yajyujcpejtım n'ixpijcin ma Dios ytiy'ajt, tzoc ajt yajyeecım nmıbıjcin, jigıx jadu'n nıpaadıp jadu'n nej jäy tııbi yhuınma'ñ yca'pıxtaayñi. Ca' n'agapxiyo'cim canaag'oc jabom jabom je tiy'ajt huıdibi ti nbaatım co oga'n nmıbıjcin Cristo. Ca' janam jatzojc

n'ixpijco'cim huidibi oga'n ti n'ixpijcm jadu'n nej co njothuimbijtim nej anajty ndunim jibicpi huidibi xyajnicxim ma yi o'cin, e jadu'n nej nmibijcm Dios oga'n. ² Ca' jadüg'oc n'ixpijco'cim je ixpijcin müd je nübejtin ycixpi, etz jadu'n nej yajcñixajy je mibijcpidijc jaydëbi paadip ajcxy je Dios yjihui'ñ ymic'ajt, etz jadu'n nej yi öcpi ajcxy yjugypigipy co anajty ti öccixy, etz jadu'n nej Dios tzaachytuna'ñ huinixi pocyjäydijc. ³ Chi njac'ixpijcm Dios y'ayuc je tzipjatypi, pen Dios jadu'n tzojcpy.

⁴ Com pinjaty ti huinjihuïy Dios y'ayuc ytiy'ajt, e jäygidägy huidibi Dios yejcpy, etz müdity Dios yjihui'ñ ma y'ay yjot, jadu'n je' nipaady nejjihuïy chinay ma jin yticxin. ⁵ Etz ti ajcxy jäygidägy Dios y'ayuc ytiy'ajt, e ti jihuiygyxy Dios yjihui'ñ ymic'ajt huidibi yajtzinaayip ajcxy y'alma ma je xi je tiempo huidibi mümb cidacp. ⁶ Yi jadu'mbi jäy, pen tundigooyb ajcxy jadüg'oc müd Dios ytiy'ajt, e ixmach ajcxy nej anajty ti mibijccixy Jesucristo, ca'p jëbi jadüg'oc jothuimbijtcixy ma Dios müd pocy ycixpi e pijtzoogixy pocyhuinmeecxin jadüg'oc. Co ixypy jadu'n ajcxy tuñ, chi huimbidzimy nej ajcxy jadüg'oc yajcruudzpejtcixy je Dios y'ung müd ajcxy ypocy ycixpi, e nixiiccixy yajxiiccixy nej Jesucristo y'o'cy müd ajcxy ypocy ycixpi. ⁷ Jadu'n yi' ajcxy nej naax nü'uuctich naag'oc naag'oc ytu'y. E pen je naax yejcpy ooy cosecha ma pin ti ñipy ti ytuñ, Dios je' anajty yconuucxin ymüd. ⁸ Pen actim apy etz actim jibic ujtz ypidzimy ma je naax, ca' je' ti tzoohuity, e Dios je' yajtigoyamb etz nöctähuip ma je mij jin. (Jada naax jadu'n jada' nipaady

jadu'n nej jäy huiḏibi ti ixmach ymibjcin.)

Yi huiḏibi nmibjcin yi' xyhuijtz'ijtım tudägy

⁹ Migügtijc ajcxy huiḏibi ooy ndzocyich, oy iich ajcxy jadu'n njamüdmıydägyich miich ajcxy, janch nejhuıybich co ca' ajcxy ti m'ixmach yi mibjcin, etz nejhuıybich co oybi conuucxin mbaadaangixyp ma Dios etz m'alma ajcxy nıdzocin paadaangixy.

¹⁰ Com Dios ooy yi' ytudägyity, e ca' yi' jäydgoy huiḏibi miich ajcxy mdumyb müd yi' ycıxpı, jadu'n nej oyjäy'ajtin ti mdungixy müd jacjadyii mibjcpıdj, e chambaad jadu'n mdungixy.

¹¹ Hue' iich ajcxy ndzocyich co miich ajcxy nidüg nidüg mnixondaaccix tungix oyjäy'ajtin ixti mabaad m'öccixy, jigix mbaadipy ajcxy tüg'ócıy huiḏibi ajcxy mjıjp'ıjxyp ma Dios. ¹² Ca' iich ajcxy ndzojccixy co miich ajcxy m'ahuimbıdipy nuux. Padungix miich ajcxy jadu'n nej ajcxy ytungixy huiḏibi mibjcp Jesucristo etz huiḏibi yajtungixp mecxtujcin, jaydēbi mbaatcixy tiibi Dios xyaj'ahuanıygixy.

¹³ Co jecy'ajty Dios moy Abraham je' y'ayuc, ci'm je' nıgapxpejty y'ayuc, com ca'anajty ji jac mijpi pin nıgapxpedipy je' y'ayuc. ¹⁴ Chi Dios Abraham nımay: "Janch co iich miich ngonucxpı, e nıöhuıpy may m'ap'ung m'apmang."

¹⁵ E jadu'n Abraham y'ahuijxy müd mecxtujcin, e jadu'n ycıdıgiıy huiḏibi anajty Dios ti yaj'ahuanıyii. ¹⁶ Co ajcxy jäy ycapxcixy co yjanchıty, jim je' pin nıgapxpejtp je y'ayuc, je pin jacmijip, je' nıgapxpejtpy jada ayuc. E co nıgapxpety je' y'ayuc, chi je ayuc y'ity, e ca' huaad pinjaty ymına'ñ co ca' yjanchıty.

¹⁷ Paady ycıxpı Dios nıgapxpejty yci'm'ayuc, müd co

anajty yajnejhuñhua'ñ je jäy ajcxy co cuyduna'ñ y'ayuc tiibi ahuanñy. ¹⁸ Ji yajpaady mejtznax Dios y'ayuc huidibi ca' huaad capxtigach, e Dios ca' y'aniidägy nimina. E co Dios jadu'n tuñ, chi xya-jjotcugñyim mij, ñich ajt huidibi n'ixtaayim e nd-zojcim yi' ypubejtin. E ti nmijpidaacim yi' y'ayuc jadu'n nej jñjp'ijxim co xymöhuaanim ajt n'alma jugy'ajtin huidibi ca' ycixipy ytigoyipy ni mina. ¹⁹ E mñd co njjp'ijxim co Dios xymöhuaanim ajt n'alma jugy'ajtin huidibi ca' ycixipy ytigoyipy, paady ajt n'alma jotcuyc ijtñm ca' ma tzigñ'ñ jñhui'ñ. Jadu'n Dios y'ayuc nipaady mñd ñich ajt ycixpi nej tñg pñjx huidibi je barco huon'ijtp meyyjoty, ca'ydi nej yjaty je barco. ñich ajt njjp'ijxim co ndigñhuaanim ma Dios y'it tzajpjoty, tim jadu'n nej je judío sacerdote mñtungmñdpi ytigñy anajty jecy'ajty ma Dios y'it ma je Dios ytñjc, je it huidibi anajty adyducyip mñd huit. ²⁰ Tigñhuaanim ñich ajt ma je Dios y'it tzajpjoty ma Jesús ytigñy mñd ñich ajt ycixpi, Jesús ti yaj'ahuäch nej jñbi ndigñyim ma Dios y'it. E jadu'n Jesús naydügpajc huingapxy etz codñäy mayjäy ma Dios yhuinduu huinixñ huñitiempo. Jesús ytung tim jadu'n nipaady nej Melquisedec ytuñ jecy'ajty.

7

Yi Jesús tim jadu'n ymñjty nej Melquisedec

¹ Je Melquisedec hue' je' anajty rey'ajtp ma je cajp huidi yxñ Salem, e je' anajty huingapxp ma je mñjp janchyp Dios tzajpjotypi. Co anajty Abraham yhuimbity co anajty oy ti chiptuñ, ma anajty je reydiñc oy ti yajqueec-huäcxtäy

ti mĩmadactäy, chi Melquisedec chooñ oy jĩpcoyöyĩy Abraham, e chi ooy Dios mĩjuydacy minucxtacy mĩĩd Abraham ycĩxpĩ. ² Huidibĩ anajty Abraham ti paady ma anajty oy ti chiptuñ, chi je' pijc-huäcxy majcpĩcy, chi pugooñ tũg-pĩcy mooy je Melquisedec. Melquisedec yxĩ hue' yhuimbĩdzĩmy “rey tudägyĩ”. E com co anajty yrey'aty jĩm Salem, hue' Salem yhuimbĩdzĩmy “jotcujc'ajtĩn”, paady jėbĩ nmĩnaanĩm jadu'n, “je rey huidibĩ jotcujc'ajtĩn yejcp”. ³ Je Melquisedec ca'p anajty yajnejhuĩy ytaj yteedy, ni y'ap yteedy. Ni ycayajnimĩydägy nej ypi'c'ajty etz nej y'ögy. Tĩm jadu'n je' anajty yajpaady nej je Dios y'ung, tũg huidibĩ huĩngapxp jäy ajcxy ma Dios huĩnĩxĩ huĩnĩtiempo.

⁴ Occuendĩtungĩxy mĩich ajcxy nej je Melquisedec anajty ooy ymĩjity. Je Abraham, ĩich ajt nmĩj'ap nmĩjteedy cĩ'm mooy Melquisedec je tũg pĩcypĩ huidibĩ anajty ti pijcĩ je rey ajcxy ma oy chiptuñ. ⁵ Nej Moĩsĩs ycötujcĩn y'ane'my je' anajty ajcxy yhuĩngapxy ma Dios ytĩjc je pĩnjaty Levĩ y'ung'ajtpy y'anäc'ajtpy, y'ap'ung'ajtpy y'apmang'ajtpy. Je' ajcxy cötujc mĩĩd co jäy ajcxy yajcuend'adĩpy tũgpĩcy je majc-pĩcypĩ huidibĩ xĩ diezmo. Oy je' anajty ajcxy ja'ajugy'adyĩ ja'amĩgũg'adyĩ, com hue' anajty ajcxy Abraham y'ap y'oc nidũg'ócĩy. ⁶ Per Melquisedec oy je' anajty ca' Levĩ ap'adyĩ teedy'adyĩ, yajcuejt je Abraham tũgpĩcy je majc-pĩcypĩ. Je' je' anajty huidibĩ cĩdigĩyĩ tĩbĩ anajty Dios yaj'ahuanĩyĩ. Jadu'n Melquisedec yajpuhuanĩy Dios je Abraham. ⁷ Ni pĩn ycamĩna'nĩp co ca' yjanchĩty co je

pin conuucxin yejcp, jac mij je', ca'ydi je pin yajconuucxp. ⁸ Ya ma ich ajt, pin cidigiiyip tugpicy je majcpicyi (diezmo), hue' je' ajcxy jay huidibi ocp. Per jadu'n nej anajty Melquisedec, jadu'n ymina'n ma yjaybetyity co je' yjactzinaayni. ⁹ E jebi yajmina'n co je Leví etz jadu'nyibaad je y'ap y'oc huidibi ajcxy huingapxp ma Dios, e yajcujtcixy Israel jay huidibi Dios patip, nañ jadu'n nipaady nej jihuïy ymigüety je' ajcxy je Melquisedec huin'it co Abraham ymigüejti. ¹⁰ Jadu'n nipaady nej jihuïy Abraham ñigix'ajtyñi y'ap'ajtin yteedy'ajtin Leví etz jacjadyi je huidibi anajty ajcxy ca'ni ypi'c'atyñi yma'xung'atyñi co oy Melquisedec yjipcobadyi.

¹¹ Je Israel cajp yajcidigiiyi je' je Dios y'ane'min ycötujcin je Levita ajcxy huidibi anajty huingapxp je mayjáy ma Dios, je' je' anajty ajcxy Aarón y'ap y'oc. Chi jada' co jada ajcxy janch ca'ocyaj'ahuimbijttáy tudägy pinjaty anajty je Dios ycötujcin payöyb, ca'p tim je' anajty ycopicyity co ycajacquëxigy jadüg huidibi codinähuij je mayjáy ma Dios, ca' y'ocje'jin ma ymiiñ Aarón y'ap y'oc. Je jadügpi huidibi codinähuaryb je mayjáy ma Dios, hue' copicy co tú'ciy naybadüyb miiid Melquisedec.

¹² Co ytigadzipy pinjaty huingapxp ma Dios, nañ jadu'n ytigadzip je tiy'ajt je cötujcin. ¹³ Ich ajt nHuindzin Jesucristo, je huidibi ñimiydacpy ma Dios ñecy co huingapxa'n je mayjáy ma Dios, huingbi ap huingbi Teedy je' anajty, ca' y'ocLevijn. E ni tüg yi' y'amigüg ca' yhuingapxy ma Dios.

¹⁴ Huadz yajnejhuïy co ich ajt je nHuindzin Jesús hue' je' anajty ymij'ap'ajty ymijteedy'ajty je Judá. Moisés ca' yi' capxpaty Judá y'ap y'oc co nimiydacy

pinjaty anajty huingapxp je mayjäy ma Dios ytijc.

¹⁵ Jacnigüexicp jada ooy co jadüg ytigüy huidibi tumb ma Dios, huidibi tú'ciy naybaatip müd Melquisedec. ¹⁶ Ca'p Jesucristo yajtungbijci co huingapxp je mayjäy ma Dios müd je cötujcin huidibi minaamb co yi' y'amigügtijc pátip yi jadu'mbi tung, je huidibi ajcxy yjugy'ajtin cixip tigoyip. Hue' je Jesucristo chinaayin yjugy'ajtin ca' ycixipy ytigoyipy ni mina, paady ycixp Jesucristo yajtungbijci huingapxp je mayjäy ma Dios. ¹⁷ Com müd je' ycixpi jadu'n Dios tiy'ajt yejcy co jadu'n ymina'n:

Miich je' cham mhuingapxyp je mayjäy ma iich. Tüg nax miich mhuingapxin nej Melquisedec anajty yhuingapxy.

¹⁸ E jadu'n je oga'nbi je ane'min cötujcin huidibi Moisés yejc, ca' y'octuni cham, ca' jac ti mic'ajt müdity co jaydëbi yajtzögipy jäy ajcxy y'alma. ¹⁹ Je Dios ycötujcin huidibi Moisés jayhui'm jecy'ajty, ca'p je' ni ti yaj'oybidzimy yajhuätzpizimy. Müd je huingapxpi ycixpi huidibi nmüd'ajtim cham jac'oy yi' huidibi njipp'ixim ma Dios.

²⁰ Co Dios Jesucristo yajtungbicy, chi nïgapxpejty yci'm ayuc co yjanchity. ²¹ Jacjadyi ajcxy huidibi anajty tungixp ma Dios ytijc, hue' je' ajcxy tung-mooyi, e ca' Dios nïgapxpejty yi' ajcxy y'ayuc. Per co Jesucristo ytungbijcy, chi Dios nïgapxpejty yci'm'ayuc. Com jaybety jadu'n ma Dios ñecy ma jadu'n ymina'n:

Je Huindzin Dios ti nïgapxpety yci'm'ayuc, e ni mina ycajotmetzcihuipy.

Jadu'n Dios nimay y'ung:

Miich mhuingapxamyb etz mgodinähuamyb je mayjäy ma ñch huinixi huinítiempo. Jadu'n miich mdunipy nej Melquisedec ytuuñ.

²² Com Dios ñigapxpejty yci'm'ayuc co yjanchity co Jesucristo ytungbıjcy, paady yi' Jesús yi' je' majamoy mic'ajtmoy je jemybi ayuc huidibi ya-jhui'm mıd jäy ajcxy ycıxpi, je jac'oybi cötujcin.

²³ Jacjadyii huidibi anajty yhuingapxcıxy ma Dios ytıjc, nimay anajty ajcxy ooy. Com co tüg y'o'cy, chi huingbi ytıgiy ma je' ytung. ²⁴ Jesús com ca' yi' yjugy'ajtin ycıxipy ytıgoyıpy ni mina, paady ca' ytung ixmach, etz ca' yi'ytungmöy ni pin. ²⁵ Mıd je' ycıxpi Jesucristo mic'ajt mıdity jaydëbi yajnıdzoocıpy jäy ajcxy y'alma huinixi huinítiempo, pinjaty mıbıjctzooyb Dios ma Jesucristo yxi. Jesucristo jëbi tunıpy jadu'n, com yi' yjugy'ajtin ca' ycıxipy ytıgoyıpy ni mina. E yi' Dios mıbıjctzodıb mıd jäy ajcxy ycıxpi jabom jabom huinixi huinítiempo.

²⁶ Je Jesús je' je' tügpajc je mıjtungmıdpi ma Dios, huidibi ñch ajt nyajmayajtim, je huidibi mıd huädz yjot huädz yhuınma'ñ, e ca' je' mıdity ni ti jıbıcpı ni ti pocy. Je' ca' tügnax y'ity mıd pocytumbıdjı. Nıgi je' ymıjity ycıxity, ca'ydı jac ti huidibi yajpat tzajpjoty. ²⁷ Ca' Jesús yjadu'nıty nej ajcxy jacjadyii huidibi tuun ma Dios ytıjc jecy'ajty, co yaj'öccıxy iyujc, e je' ajcxy yejcpy huındzıgi'ñ jabom jabom, mıdüg co je' ajcxy ñayyajpocyñıhuächyii, e chi jada' mıd jäy ajcxy ypocy ycıxpi. Jesús tügtecypajc je' yejc huındzıgi'ñ mıd mayjäy ycıxpi, co je' ci'm ñayyejci ma yi' o'cin jadu'n nej tüg huındzıgi'ñ. ²⁸ Je Dios ycötujcin

huidibi Moisés yjayhui'm jecy'ajty, hue' y'ane'my co huen tungmöy jäy ajcxy huidibi pocy müd, co mïjtungmoy ma Dios ytijc. Chi jac'axam Dios yajhui'my jemybi ayuc jemybi cötujcin, e nïgapxpejty yci'm'ayuc co yjanchity. E müd je jemybi ayuc Dios tungmoy yci'm'ung, huen yajnicxip je mïjpi tung ma yi' y'it, je Dios y'ung huidibi ijtp huinixi ca' ti bocy müdity.

8

Jesús yi' je' je mijhuingapxpi ma yi Dios y'ayuc jemybi

¹ Huidibi ooy nïgi ycopyity, huidibi yajnimiydaacp, co ich ajt nmüd'ajtim pin xycodinaayim ma Dios, je' je' je Cristo, je huidibi jiiby ijtp mij'ane'mbi tzajpjoty, jadu'n nipaady nej jihuüy yi' y'inäy a'oy'amy ma Dios ymijc. ² Jiiby je' ytuñ ma je janchypi Dios y'it ylugar, je amaaybi, huidibi oyhuindzigi'y ijtp. Je it huidibi Dios yajcoj, e ca' nmïnaanım jäy ajcxy yajcoj. ³ Tüg'ócıy pinjaty huingapxp ma Dios, yajnıbcıy je' paady, e copyity co cıyegıpy ofrenda etz tijaty huindzigi'ñ ma Dios müd jäy ajcxy ypocy ycıxpi. Paady ooy ycopyity nañ jadu'n co Jesucristo yegıpy ofrenda etz huindzigi'ñ ma Dios müd jäy ajcxy ypocy ycıxpi. ⁴ Co Jesucristo ixıypy ya y'ocyajpaady naaxhuiñ, ni ycahuingapxy ixıypy mayjäy ma Dios. Com jiini ya yajpaady pin huingapxip ma Dios ytijc, pin yejcp ofrenda etz huindzigi'ñ jadu'n nej Moisés ycötujcin y'ane'my. ⁵ Jadayaabi huingapxpi ajcxy ytungıxy ma Dios ytijc ya naaxhuiñ. Je' je' tüg iıxpejt nej Dios y'it

jiiiby tzajpjoty, jadu'n yi' nipaady nej tög anecpi huiḁibi tzomyb jiiiby tzajpjoty. Co Moisés jecy'ajty Dios ytijc je' coji müd huit, chi Dios ñimaayi: “Cuenditun yajxon co anajty mgojy je tijc tögnaḁ jadu'n nej je iḁxpejt huiḁibi nyaj'ijx jim copcixy.”

⁶ Per je mĩjtung huiḁibi Jesús ytumyb ma Dios müd jāy ajcxy ycixpi, jac'oydung yi' ca'ydí je tung huiḁibi je jāy ajcxy ytumyb huiḁibi mĩjtung müd ma Dios ytijc ya naaxhuiñ. Com jemybi etz jac'oy etz jacmíc'ajt müd je cõtujcin huiḁibi Dios ymoy Jesús, ca'ydí je cõtujcin huiḁibi Dios ymoy Moisés jecy'ajt. Com hue' je' jac'oy alma nĩdzoocin Dios yaj'ahuanĩy jāy ajcxy ma je jemybi cõtujcin.

⁷ Co je jayĩp'atypĩ cõtujcin huiḁibi Moisés ymooyĩ cayaj'oyĩydaayĩ jāy ajcxy ypocy müd Dios, ca' yi' ixyipy ycopicyĩty je mĩmetzpĩ cõtujcin huiḁibi Dios ymoy jāy huinjemy. ⁸ Per Dios y'ijx co je jāy ajcxy ca' yajxon cuydungixy je cõtujcin huiḁibi Moisés ymoy, jadu'n nej ymĩna'ñ ma yjaybetyĩty ma Dios ñecy müd je' ajcxy ycixpi, ma jadu'n ymĩna'ñ:

Jadu'n je Huindzin Dios ymĩna'ñ: “Mimb xii tiempo ma huingbi cõtujcin nmöhuibich yi Israel jāy etz Judá jāy ajcxy.

⁹ Ca' y'ocjadu'niñ nej ĩch ngõtujcin huiḁibi nmooyĩch je' ajcxy y'ap yteedy jecy'ajty, je huin'it tiempo taabi nyajtzoofĩch ajcxy jim Egipto naaxjot. Ca'p je' ajcxy cuyduñ je cõtujcin huiḁibi ajcxy nmooyĩch, e paady ca' nduufĩch cuendi yi' ajcxy.” Jadu'n ymĩna'ñ je Huindzin Dios.

¹⁰ Jadu'n je Huindzin Dios ymĩna'ñ:

Je cõtujcin huiḁibi nyegaamybich ma Israel jāy

ajcxy co anajty yjadu'mbi xii tiempo ti ñaxy, jadu'n je'. Nbidägbich ngötujcin ma yi' ajcxy yhuinmañ, e jadu'n nipaady nej jihuïy ti njayich n'ayuc ma ajcxy y'ay yjot. E ñich yi' ajcxy xyDios'adiib, e yi' ajcxy njäy'adiibich.

11 Tüg'óciy ajcxy nejhuïhuipy pin ñich. Ni pin ji cayaj'ixpigipy pin je' je Huindzin Dios, ni pin, ni ymüg, ni ymijün ymidijc, ni pi'ctijc ni mij'anäctijc. Com nidüg'óciy ajcxy nejhuïhuipy pin ñich; ypi'city ymutzity, ymijjäyity, etz ymij'anäcity.

12 E ñich yi' ajcxy nmeecxip yjibicjäy'ajtin, ni camina ngajac'ajihuïhuïybich ajcxy ypocy. Jadu'n Dios yminañ.

13 Co Dios je' ycötujcin jemybi nimïydägy, je' je' co yaj'amijyñi je jayip'atpyi cötujcin. Je huïdibi amijyñip ca' je' y'octuunip, tzojc yi' yaj'ijxtigoyaani.

9

Je Dios ytijc huïdi ya naaxhuiñ etz Dios y'it huïdi tzajpjoty

¹ Je Dios ycötujcin jayip'atpyi ymiid je' anajty ñidiy'ajt nej huaad ytuñ ma Dios ytijc ya naaxhuiñ, ma jäy ajcxy huindzigihuipy Dios. ² Je Dios ytijc jadu'n je' ycojity. Je jayip'i cuarto hue' anajty xijity Lugar Santo, jiiy anajty y'ity je candelero etz je mesa ma tzajcaagy y'ity ma Dios yhuinduu. ³ Jixci'py'amy ma je mimetzpi huit y'agiyducyity jiiy jadüg'it huïdibi xijip Lugar Santísimo (ma Dios ni'ixcidägy je jäy). ⁴ Jiiy anajty tüg mij mesa ac tim ori je' anajty ma ajcxy ypoomjojcixy, e

ma je' jīm anajty y'ity tūg cajoön ac ori je' anajty yñinīcx huidityi. Jiiby cajoönjoty anajty y'ity tūg tu'tz ac ori huidibi anajty mīid je jīcxy iījpejt huidibi Dios Israel jāy ajcxy ymooy jecy'ajty. Etz jiiby anajty Aarón ytajc huidibi huijp huam. Etz jiiby anajty je tzaa y'ity ma je' anajty yciyxjayity Dios y'ane'mīn. ⁵ Ma je cajoönīcx jīm anajty je querubines ñģojtūdyity huidibi Dios y'oy'ajtin mīid. Je querubines anajty codīnaayb Dios, e je' anajty ajcxy yajnīdģooyb mīid yqueec je cajonīcx ma ajcxy je huidzīgī'ñ ñī'py ypidacy mīid jāy ajcxy ypocy ycīxpi. Ca' huaad yjacyajnimīydacy mijcajee jadachambi tijaty huidibi anajty yajpatp jiiby ma Dios ytījc.

⁶ Jabom jabom co anajty jadu'n y'ijttāy ni'ixi', chi je huīgapxpi ytiģīyģixy ma Dios ytījc ma je jayījpī cuarto, je Lugar Santo, tuñ ajcxy huīndzīgī'ñ etz cuydungīxy yī' ajcxy ytiy'ajt mīid Dios ycīxpi. ⁷ Jīmījt jīmījt ma je mīmetzpi cuarto huidibi je huit adīydujcp, jiiby ytiģīy tūģtecypajc je huīgapxpi huidibi jacmījtungmīid ma Dios ytījc. E co jiiby ytiģīy, chi mīdīgīy huaj ñī'py, huidibi mīid huīndzīgīy Dios mīid yci'mbocy ycīxpi etz mīid tūģ'ócīy jāy ajcxy ypocy ycīxpi etz mīid ajcxy ypocy ycīxpi co ca' nejhuīyģixy co ytundģooyģixy. ⁸ Mīid jada ycīxpi je Espīritu Santo xyajnejhuīyīm co je tungmīidpi huidibi huīgapxi je mayjāy ma Dios, ma ajcxy jacyajtungīxy anajty je jayījp cuarto ma Dios ytījc, chi ca'ni je' anajty y'ahuāchñī nej jēbi pīnjaty ytiģīy ma je it lugar Santīsimo ma Dios yhuīnduu. ⁹ Je Dios ytījc huidibi ijtp anajty ya naaxhuiñ ca' je' yjējity je janchypi. Hue' je'

anajty iixpejt'ajtp huiði Dios y'it'ajtpy tzajpjoty. Jiiby je tungmüdpí huindzigíy Dios müd ofrendas etz müd huindzigí'ñ. Per jada huindzigí'ñ ca' yajtigoy je pocytuní ma je jäy ajcxy yjot yhuinma'ñ. ¹⁰ Je judíojäy ytiy'ajt huiðibi tuun ma Dios ytiç jecy'ajty, hue' je' ñigapxy caayin uucin, etz jadu'n nej ajcxy ñayyajpocyñíhuáatzigixy müd ní etz canaag costumbre huiðibi ajcxy cuydumyb. Jadu'n ajcxy ytuñ ixti cooni Dios yajtigajztay tüg'óciy yí ycötujcin.

¹¹ Per ti y'oy ya naaxhuiñ je Cristo, e yí je' cham ijtp jacmíjtungmüdpí ma Dios, yí ti mimiñ jemybi cötujcin jac'oybi. E yí je' codinaayb je mayjäy ma Dios y'it tzajpjoty, je it jac'oybi jacmípi, jacca'pxypi, ca' nmínaaním jäy ti cojy, e ca' yaajity naaxhuiñ. ¹² Cristo ti ytigíy ma je Dios y'it, je lugar Santísimo. Ca' ti ytigíy müd co jiiby yajquëxíga'ñ pi'cchivo ñi'py o toro ñi'py, hue' yci'mni'py jiiby yejcpy ma Dios. Jadu'n ti ytigíy tügtecy tigíy huinixí huinítiempo, etz xyayjñidzoocím ajt n'alma huinixí. ¹³ Ooy yjanchity co yí toro ñi'py etz je chivo ñi'py etz yí cuyjam co ajcxy nöccixy huaj níx ma je Dios ojadajtac, co ajcxy je pocyjäy yajníhuäxcixy je ni'py etz yajníxidujtcixy je cuyjam ymüd mic'ajt co yajpocyhuáatzigixy ñiníçx, per jotjoty ca' yajhuäch. ¹⁴ (Je huingapxpi huiðibi tumb ma Dios ytiç ya naaxhuiñ ca' ymadägy co jäy yajpocyhuädziipy müd toro ñi'py), Jesucristo ñigi ti ymadägy yajpocyhuäch jäy ajcxy müd yci'mni'py. Com Jesucristo ymüd je Dios yjihuí'ñ ymic'ajt huiðibi ca' ycixipy ytigoyipy ni mína, chi ñaygíyejci ci'm ma Dios müd Dios yjihuí'ñ

ymic'ajt, jadu'n nej tüg huindzigi'ñ huätzpi, com ca' ni ma ni ti tundigoy. E mïd yci'mni'py Jesucristo xyajhuaatzim je jibicpi ma ajt njot nhuinma'ñ, ca'ydi ndunim huidibi Dios ca' jäygidägy, e jadu'n ajt huaad ndunim ma je Dios juugypi ytung.

¹⁵ Paady yi Jesucristo yi' je' huingapx'ajtp ma Dios mïd ïch ajt ycixpi mïd je jemybi ycötujcin huidibi Dios yajhui'm. Yi Jesucristo co y'o'cy, yi' ajt je' nbocy xymeecxim tiibi ndundigooyim ma je jayijp'atyp cötujcin huidibi Moisés jayhui'm. E jigix pinjaty Dios ti yhuin'ixyii, jëbi ajcxy yc'idigïyii je tzinaydac ma jëbi n'ijtim huinixii. Je tzinaydac huidibi Dios ti xy'ahuaniiyim. ¹⁶ Co tüg jäy jïjp'ixy y'o'cin, e yajcojy tüg testamento, ooy ycopicyity co yajnejhuïhuipy pen janch je' ti y'ögy je pin yajcoj je tiy'ajt jigix je' ytigïhuipy tumbi je tiy'ajt. ¹⁷ Co tüg jäy jïjp'ixy y'o'cin e yajcojy tüg testamento, ca' je' ti mic'ajt mïdity je testamento pen jugy'ajtni pin je' anajty ti yajcojy. Huin'itni janchtiy co anajty ti y'ögy, huin'it je testamento mic'ajt mïdity. Je jemybi tiy'ajt huidibi Dios xyajhui'my jadu'n yi' nipaady nej jäy testamento yajcojy co anajty jïjp'ixy je y'o'cin, e co Jesús y'o'cy, huin'it mic'ajt moy je Dios ytiy'ajt je jemybi. ¹⁸ Paady ycixpi jecy'ajty co Dios Moisés moy cötujcin, yajtzoobaat je' mïd iyujc ñi'py. ¹⁹ Moisés je' capxhuäcx je Dios ytiy'ajt ma tüg'óciy mayjäy. Chi jada' huijtzïgy tüg lana tzaptzpi mïd tüg quipy aacx huidibi ooy oy yxuugy. Je' yajxooc ma huaj mang ñi'py etz chivo ñi'py teemhuidity mïd nïi, chi Moisés yajnïhui'ch je libro mïd je ni'py, je libro huidibi anajty ti capxy etz nañ jadu'n jäy ajcxy yajnïhui'ch je ni'py.

²⁰ Co Moisés jadu'n ytuuñ, chi ymīnañ: “Jada je' je nī'py huīdībī yajtzoobatp je ane'mīn je tīy'ajt huīdībī Dios tī yecy ma mīich ajcxy.” ²¹ Moisés nañ jadu'n ñī'pyñīhui'ch je cochac tījc ma anajty yDios ojadajtcīxy, e tūg'óciy tumbajt huīdijaty jīiby tumb. ²² Dios ycōtūjcīn, je jecyīp, ymīna'ñ co tūg'óciy huīdijaty yajtungīxyp co Dios ojadajtcīxy, copīcy yajhuādzīpy mīid nī'py. E pen ca' ajcxy teemy yocy nī'py, Dios ca' huīnmecxa'ñ yī' ajcxy ypocy.

Co Cristo y'o'cy mīid ajt nbocy ycīxpi, yī' yajnicxy ajt nbocy

²³ Ooy jada anajty ycopīcyīty īyujc ñī'py huīndzīgī'ñ, jīgīx yhuādzīp huīdijaty tumb ma Dios ytījc ya naaxhuiñ, je huīdībī ījxpejt'ajtp anajty nej Dios y'it jīiby tzajpjoty. Per je Dios y'it huīdībī jīiby tzajpjoty chojcpy jac'oybī huīndzīgī'ñ ca'ydi huīdi ya naaxhuiñ. ²⁴ Com Cristo ca' je' ytīgīy ma Dios ytījc huīdībī jāy ajcxy tī cojy. Je tījc huīdībī jāy ajcxy tī cojy, je' je' ñīgojtuutīn je it lugar janch janchypī huīdi jīiby tzajpjoty. Cristo tīgīy ma je Dios y'it ylugar jīiby tzajpjoty, ma je' cham xycodīnaayīm ma Dios yhuīnduu. ²⁵ Je judío mījtungmīdpi huīdībī huīngapxp ma Dios ytījc, huīnjīmījtīty ytīgīy ma je Dios ytījc co yecy nī'py huīdībī ca' cī'mnī'py'adyīi. Cristo ca' yī' ñay'ahuanīyīi y'ōgīpy canaag'oc, jēyī tūgtecpajc ytīgīy ma Dios y'it mīid ycī'mnī'py. ²⁶ Co īxyīpy ca' yjadu'nīty, canaag'oc Cristo īxyīpy patnī chaachy'ōcīn maabi naaxhuiñybi chondagy. Per jadachambī ma xīi tiempo ycīxaani ytīgoyaani, Cristo tūgtecpajc ñayguēxīci ya naaxhuiñ, jīgīx codīnāhuīpy tūg'óciy jāy ma Dios mīid ajcxy ypocy ycīxpi. Jadu'n Cristo

tuuñ jigix yajtigoyipy pocytuni. ²⁷ Dios ane'min pidac ya naaxhuiñ co nidüg nidüg jäy paadip yi o'cin tügtecypajc. E Dios ti pidägy je xii je tiempo mina tiyduna'ñ nidüg nidüg jäy miid ypocy ycixpi. ²⁸ Je Cristo jotcuyc tügtecypajc nayyejci ma je o'cin co yajpocyñihuaatztäy je mayjäy. Chi jada' ñayguëxiga'ñyii je mimejtz'ocpi ya naaxhuiñ, e ca' nminaanim co yajpocyñihuaatzaanip jadüg'oc je mayjäy, hue' je' nihua'namyb ycohua'namyb tüg'óciy pinjaty jipp'ixip cixyjot huinijot co je' miina'ñ miid yi' ajcxy ycixpi.

10

¹ Je Dios ycötujcin huidibi Moisés jayhui'my jecy'ajty, hue' je' anajty ñidiy'ajt je oybi huidibi miinamb. Ca'p je' anajty yjëjity je oybi. Paady je cötujcin huidibi Moisés yjayhui'm ca' je' jëbi huädz yaj'ahuimbity pinjaty pocy ytumb, pinjaty mijhuäcp anajty ma Dios miid je iyujc huidibi ajcxy Dios yajhuindzigiiyb, huidibi ytun'ahuimbijtcixyp jimijt jimijt. ² Co ixypy je cötujcin y'ocmadägy huidibi Moisés yjayhui'm yaj'ahuimbity ixypy huädz ajcxy je pocy ytumbi, ca' ixypy je jadu'mbi huindzigi'ñ y'ocyajtuuni jimijt jimijt. Com pin je jadu'mbi huindzigi'ñ yejcp, co ixypy je' ypocy yajnicxtäy, ca'p je' ma ñayjihuihuiyb ti bocy miidity jadüg'oc. ³ Co jadu'n yaj'öccixy je iyujc miid ypocy ycixpi, je' je' je' tiy'ajt co ajihuiygóotigixy ypocy jimijt jimijt. ⁴ Com yi huaj mang ñi'py etz yi chivo ñi'py ca' mic'ajt miidity co pocyyajnicxtähuipy nimina.

⁵ Paady co Cristo ymiiñ ya naaxhuiñ, chi nimay je Dios:

Ca' miich ni ti huindzig'i'ñ mdzojcnì ma ymiiñ
iyujc'ögy, ti miich xyñi'ixi'yich tüg ninìcx.

⁶ Ca' m'ocjäygidaacni huindzig'i'ñ iyujc huiðibi ya-
jno'cp. Ca' miich m'ocjäygidaacni co jäy
xyajhuindzigiy iyujc müd ypocy ycixpi.

⁷ Chi nmìna'ñich: “Dios, cha nmiiñich jigix mi-
ich mdzojcn yajcuydunipy, jadu'n nej yjay-
betyity ma miich mnecy müd ñich ycixpi.”

⁸ Tim jayijp, Cristo ymìna'ñ co Dios ca' octzojcnì,
ni cajäygidägy je iyujc ögy huiðibi yajhuindzigiyip,
ni je huiðibi yajno'cp, jigix je pocyñicxtähuipy, oy
yi' yjajëjity huiðibi ñigapxy yajtunipy ma je Dios
ycötujcn huiðibi Moisés yjayhui'm. ⁹ Chi jada'
jadüg'it yjaybetyity co Cristo jadu'n ymìna'ñ: “Cha
ñich nmiiñ, jigix miich mdzojcn yajcuydunipy, mi-
ich huiðibi Dios'ajtp.” Hue' mìnanim, yajtigoy
je cötujcn huiðidi ane'mb co jäy ajcxy huindzigiiy
iyujc müd ypocy ycixpi, etz mic'ajt mo' je jemybi
cötujcn huiðibi Jesucristo xymooyim. ¹⁰ Dios
jadu'n ti xyajhuaatzim ajt nbocy, com Jesucristo ti
tuuni Dios chojcn co ci'm ñinìcx tügtecypajc yejcy
ma yi o'cin müd tüg'óciy jäy ypocy ycixpi.

¹¹ Tüg'óciy judío sacerdote huiðibi tungmüd ma
Dios ytiyc jabom jabom jadu'n tun'ahuimbijtcixy
tügpì huindzig'i'ñ, huiðibi ni camina yajnicxtaayi
jäy ajcxy ypocy. ¹² Yi Jesucristo tügtecypajc yi'
yejcy ñinìcx ma yi o'cin huinixi huinìtiempo,
chi jada' y'ixtacy a'oy'amy ma Dios ymijc ma
ane'mdäy tüg'óciy. ¹³ Jiiby tzajpjoty Jesucristo
cham y'ahuixy, ixti cooni Dios yi' ymìdzip
mimadactaayip, e jadu'n ajcxy nipaadipy nej
jihuiy Jesucristo ytecypocxpejt. ¹⁴ Müd tügpajc

je huindzigi'ñ huiðibi Jesucristo yejc, tudägy yaj'ahuimbijttäy huinixi huinitiempo pinjaty ti ypocyhuäch. ¹⁵ Yi Espíritu Santo nidiy'ajtp ma iich ajt jadu'n nej Cristo ti tuñ. Com jaybety miiñ ma Dios ñecy ma Dios jadu'n ymina'ñ:

¹⁶ Je huin'it xi je huin'it tiempo nyajmihui'maamybich je Israel jäy jemybi ayuc jemybi tiy'ajt. Nbiðägibich ngötujcin ma ajcxy yjot, e njayamybich ngötujcin ma ajcxy yhuinma'ñ.

¹⁷ Chi jac'axam Dios ymina'ñ:

Ni camina njäymedzaanich ajcxy ypocy, etz jadu'n nej ajcxy ytundigooy.

¹⁸ Co je pocy ti yajhuinmecxtäy, ca'p ycopicyity yjacyajtunipy tijaty huindzigi'ñ miið pocyhuinmeecxin ycixpi.

Chojcpy nmihuingoonim yi Dios

¹⁹ Paady miich ajcxy migügtijc, jëbi iich ajt ndigiiyim agujc jotcujc ma Dios yajpaady miið co Jesucristo ti temy ti yocy ñi'py miið iich ajt nbocy ycixpi. ²⁰ Cristo ti yaj'ahuäch je ñi'aa je tü'aa miið iich ajt ycixpi miið yci'm ninicx, je ñi'aa tü'aa jemybi oybi huiðibi tigiiyb ma Dios y'it. E je' yñinicx jadu'n nipaady nej je huit huiðibi anajty adujcp je Lugar Santísimo ma Dios ytiyc ya naaxhuiñ, je huit huiðibi cichhuäcx co Cristo y'o'cy. ²¹ Jesucristo yi' je' je mijtungmiiðpi huiðibi xycodinaayim ma Dios ytiyc jiiyby tzajpjoty. ²² Paady ycixpi jëbi nmihuingoonim Dios miið oyjot oyhuinma'ñ, etz miið je mibijcin janchypi. Cristo ajt ti xyajhuaatzim njot nhuinma'ñ co ñi'py temy yojcy miið ajt nbocy ycixpi jigix

ca'ydi najjihuïyïm pocymïd, jadu'n nej jihuïy ti ndziihuim mïd huädz nïi. ²³ Tzoc tudägy n'ijtim ma nmibijcin, ca' nyajtigajtzim nmibijcin, com Dios cuydunipy yi' tïibi xyaj'ahuanïyïm. ²⁴ Tzoc nhuinmañypidaacim co njot'amijmooyim ajt nmigügtijc, jaydëbi naychojcim najjihuïyïm miñ xyipy, e nduunim oyjäy'ajtin. ²⁵ Ca' n'ixmajtzim je nayyöymugï, jadu'n nej ajcxy nijëjity costumbre mïdity co ca' ajcxy yöy ma naymujctac. Nigi tzoc nayjot'amijmooyim, e jadu'n nej cham yaj'ixni co yhuingooni ma je Huindzin Jesucristo ymiinaani jadüg'oc ya naaxhuiñ, chonañ tzajpjoty.

²⁶ Pen ïich ajt japocytunim tzojcingïxy ma anajty ti nejhuïyïm Dios ytiy'ajt, ca'p ji huingbi huindzigiñ huidibi xyajpocyhuaatzim. ²⁷ Je' janchtiy njacijp'ijxim mïd tzigïñ jihuïñ je tzaachypi co anajty Dios xytiydunim, e xypidaacim mijjinjoty huidibi yajhuindigoydähuamb Dios ymidzip. ²⁸ Co pin cacuyduun Dios ycötujcin huidibi Moisés yjayhui'm, e jim metz o tugïg testigo co yjadu'nity, yajmoy je' y'o'cin ca' mïd'ajty ti pa'ayoohuin. ²⁹ ¿Nej miich ajcxy minaangïxy? ¿Nej cay jac'öctiy je tzaachypi mihuaad'ajtcïxy? Je pinjaty ca' ixañ Dios y'ung etz nixiici yajxiici Cristo ñi'py huidibi yajpocyñihuaatzp, jadu'n nej je jemybi ayuc yminañ huidibi Dios yajhui'm. Etz nañ jadu'n ajcxy ni'ojïygiïxy Dios yEspíritu huidibi may'ajt oy'ajt tumb mïd je' ajcxy. ³⁰ Nejhuïyïm co je Huindzin Dios yminañ: “ïich xypatp ndzaachtunipyich jäy ajcxy mïd ypocy ycïxpi. ïich yi' nyajcomïdohuipy ajcxy ypocy.” Etz nañ jadu'n yjaybetyity ma Dios ñecy: “Yi Huindzin Dios

yi' yjāy tiydunipy.” ³¹ ¡Ooy chach mij y'ayo'nity pen je Dios juugypí xychaachytunim mīd ajt nbocy ycixpi!

³² Per ajihuñyigixy miich ajcxy je xī je tiempo tiibi ñaxy, je taabi miich anajty ajcxy ti xycīdigñyigixy je tiy'ajt janchypi, ñipaty je' anajty nej tūg tiicxin jajin ajcxy mīdity. Ti ooy mhuindinaaygixy mjijptinaaygixy tzaachypi ayo'n mīd yi mmibijcin ycixpi. ³³ Nijējity

miich ajcxy ti myajhuingapxnajxcixy, e ti myaj'ojcixy mayjāyduum. Nañ jadu'n jacjadyi ti abaatcixy tzaachypi jadu'n nej je tiibi ajcxy ooy yajtzaachytungixy. ³⁴ Ti miich ajcxy myajtungixy pa'ayo'n ma pinjaty anajty pujxtigotyip, e janch agujc jotcujc ajcxy ti myajtungixy mecxtujcin co ajcxy xypici tijaty anajty ajcxy mīd. Nejhuñyim co jiiby tzajpjoty miich ajcxy mīdity ti jaty jac'oybi huidibi huinixi huinitiempo ijp.

³⁵ Jacmijpidaaccixy Dios, ca' mjetmetzcñygixy. Co mmijpidáaccixipy Dios, huin'it ajcxy mbaadipy oybi may'amy ma Dios. ³⁶ Chojcpy co miich ajcxy myajtūngixipy mecxtujcin co mguydunaangixy nej Dios tzocy, e Dios xyajcīdigñyigixip huidibi yi' ti ahuanñy. ³⁷ Jaybety jadu'n ma Dios ñecy ma jadu'n yminañ:

Tzojc, janch tzojc ymiinañ je huidibi tzonamb tzajpjoty, e ca'p je' jecyñity.

³⁸ Jadu'n Dios yminañ:

Pinjaty ich ti ngōbicy co ytuđagyjāyity, tzināhuip je' mīd ymibijcin. E pen ixtigihua'cp ma ymibijcin, ca' jadu'n njotcujc'adipyich mīd je'.

39 Ca'p ñch ajt njējity huiḁibi ixtigihua'cp ma nmibijcin, e ytigoy y'alma, je' ñch ajt pín mibijcp, e jadu'n n'alma paadipy nĩdzoocin.

11

Yi mibijcin

1 Jotcuje nayjihuiyım jadu'n co huiḁibi nmibijcin janch yi', oy co ca' n'ijxim. Je huiḁibi nmibijcin je' xymooyım jotcuje'ajtın mĩd huiḁibi njijp'ijxim ma Dios. Je huiḁibi nmibijcin nejhuiyım co janch janch jadu'n, oy ca' n'ijxim.
2 Com mĩd co ajt nmij'ap nmijteedy ajcxy mibijci Dios y'ayuc paady Dios cōbijcy ajcxy jadu'n nej tudāgyjāy.

3 Mĩd ajt nmibijcin ycıxpı nejhuiyım co Dios oyduñ tũg'óciy huiḁibi jii'ajtp mĩd y'ayucti'ajty, jigix huiḁibi cham n'ijxim je' yi' yaj'oyıy huiḁibi ca' yaj'ixy.

4 Mĩd co Abel mibijcy Dios, paady Abel ymoy Dios huindzigi'ñ jac'oybi ca'ydi Caín, e Dios cōbijci Abel yhuindzigi'ñ, e mĩd je' ycıxpı Abel ooy ycōmaybidzımy ma Dios co anajty ytudāgyıty. E jadu'n oy Abel ti yja'o'cini, jadu'n nipaady nej jihuıy yjacmıydāgyñi chambaad. Com mĩd je mibijcin huiḁibi anajty ymĩd yejc ixxpejt ma ñch ajt.

5 Mĩd co Enoc mibijcy Dios paady yajnicxi jadũgpi tzınaydac ni yca'o'cy, ni ca' ajcxy paty, com Dios anajty ti yajnicxyii. Jadu'n ymına'ñ ma yjaybetyıty ma Dios ñecy, ca'ni anajty yajnicxyii: “Dios jāygidacpy anajty Enoc chinaayın.” 6 Pen ca' nmĩd'ajtim mibijcin ni jadu'ñyi, ca' Dios jāygidāgy

ajt ndzinaayin. Com co nmihuingonaanim Dios, hue' tzocy co mibijcim co Dios yjiijity, e co yaj'ahuimbidipy oybi müid pin mibijcip.

⁷ Müid co Noé mibijcy Dios, paady Dios ñimaayi jayijp co ytuna'ñyii yjada'ñyii mijñigom huidibi anajty ca'ni yaj'ixy. Co Dios ymigapxi, chi Noé yjotmaybaady e yaj'oyiy je barco ma yi' etz y'ung y'anäg ñigomdzögipy. Müid co anajty Noé müidity mibijcin, paady yajpocycäy je naaxhuiñyäjy ajcxy ca'pi ymibicy. Chi Dios cöbijcy Noé jadu'n nej tudägyjäy müid co mibijci Dios y'ayuc.

⁸ Müid co Abraham anajty Dios mibicy, paady Dios yhuin'ijxi e ycapxymidouhui. Chi je' chooñ ma ñaax ycajpın ñicxy ma je it lugar huidibi Dios anajty möhuaanip co je'adüyb. Choñ, ni ca' anajty nejhuüy ma ñicxy. ⁹ Müid co Abraham mibijcy Dios, paady chinaydacpicy nej tüg huingjäy ma je naax huidibi Dios yaj'ahuanüyi, huidibi ca' yjējity. Chinay ma huittijc, nañ jadu'n ajcxy y'idüich Isaac etz Jacob huidibi ajcxy nañ jadu'n Dios yaj'ahuanüyi je naax. ¹⁰ Abraham je' anajty y'ahuijxyp mina jēbi chinaydacpicy ma Dios y'it ylugar huidibi jadu'n nipatp nej tüg cajp huidibi müid y'ijx ta'tzpcy y'oyduñity, je huidibi Dios ñihuinmayiy, je huidibi Dios yajcojy yaj'oyüyb.

¹¹ Sara hue' anajty pumäy, ti anajty ymijäyüñi, ti ñajxni tiempo mina jēbi y'ung'ixy. Per müid co mibijcy Dios y'ayuc huidibi ti ñimaayi co y'ung'ixa'ñ anajty, chi paty mijaa co y'ungdzimigip. E chi y'ung'ijxy com ymibijc co Dios anajty cuyduna'ñ tübi ahuanüy. ¹² Müid tügpi jäy, je Abraham, ti choondacy tügpcy y'amigügtijc

huidibi oy ti ymayi. Abraham, oy anajty je' ti yjahuingoni mina y'ogaani, chi ooy y'ung y'anäg, y'ap'ung y'apmang janchmay paty, jadu'n ymayity nej madza' etz ymayity nej pu' ma mejypa', janch ni ycamicho'nity.

¹³ Tüg'óciy je jäy ajcxy huidibi ya yajnimiydacp, öctay ajcxy ni ycacidigiyi je tzinaydac huidibi anajty Dios ti yaj'ahuanii. Mïd co ajcxy mibijcy Dios, paady nejhuüy ajcxy co jacjiini Dios ymöhuiyb je huidibi ti yaj'ahuanii. Com ymibijc ajcxy Dios, paady jotcuyc ñayjihuiyi co Dios möhua'ñyii jacjiini huidibi ti yaj'ahuanii. Yminañ ajcxy co anajty y'adzinaaygixy ya naaxhuiñ. ¹⁴ Pinjaty jadu'n minamb co adzinaaybi ajcxy yajpaady, hue' yajhuimbizimy co chinaydac yjugy'ajttac ajcxy y'ixtaayb. ¹⁵ Co ixypy ajcxy jäymejtzó'cigixy je naax ma anajty ti choongixy, janch ycahuimbijty ajcxy jim jadüg'oc. ¹⁶ Per je' ajcxy nigä anajty nijot'ajtcixy it lugar jac'oybi, je' je' je' tzajpjotypi. Mïd jada ycixpi Dios ca' yi' cho'yduñ co ñaydijyii Dios ma je' ajcxy. Com ti ni'ixiyi ajcxy chinaydac jilby tzajpjoty.

¹⁷ Abraham mibijcy Dios, e co Dios Abraham y'ijxmajtzi, chi yajmiiñ Isaac co anajty yajhuindzigihua'ñ Dios. E janch cixyjot je y'ung tügpajc anajty yecy, je y'ung huidibi Dios ti yaj'ahuanii anajty. ¹⁸ Dios ñimay Abraham co mïd Isaac mïd'ada'ñ may y'ap y'oc. ¹⁹ Abraham yhuinmaayb anajty ooy co Dios tügpajc cõtujcmïdip yajjugypigipy öcipyi. Paady jëbi ñch ajt nminaanim co Abraham ycidigiyi jadüg'oc y'ung co anajty ti yjugypicy co anajty ti y'ögy.

20 Isaac mibijcy Dios, paady Isaac Dios mibijctzoy mïd Jacob etz Esau ycixpi co huen ajcxy oybi paadip ma je tiempo huidibi mim cidacni. 21 Jacob ymibijcy anajty Dios, paady co anajty y'ögaani, chi ahuanïy conuucxin ma nidüg nidüg José y'ung y'anäg. E jadu'n Dios ooy huindzigïy ojadahty yam ñaygodajc'adyii mïd ytajc co anajty ooy ti ymijjäyïyñi. 22 José co anajty Dios mibicy ma anajty y'ögaani, yminañ co Israel jäy ajcxy anajty ypidzimaangïxy comjety jim Egipto, chi yajhui'my tïy'ajt nej ypajc ytunïyb co anajty choñ ajcxy jim Egipto.

23 Mïd co anajty ajcxy mibicy Dios, paady co Moisés yma'xung'ajty, chi ytaj yteedy yützi tugïg po'. Com co ajcxy ijxy co anajty ooy y'oyity je ma'xung, ca' ajcxy anajty tzigïy je rey y'ane'min co anajty yaj'öctähua'ñ tüg'öciy ungma'xung yëydijcpi. 24 Mïd co Moisés mibijcy Dios, paady co oy ymij'anäccojni, ca' tzojcy co ñaydijïyb co rey ñïx y'ung'adiib. 25 Hue' janchtiy Moisés ñigi nijot'ajty co ayo'n tzaachypi minaxipy yajnaxipy quipxy mïd Dios yjäy, ca'ydi co nixondägipy je jugy'ajtin ma je rey ytijc huidibi Dios ca' jäygidägy. 26 Moisés ñigi ñayjihuiyi jotcuyc co tzaachypi ayo'n anajty minaxy yajnaxy mïd Cristo ycixpi, ca'ydi co mïd'ajttähuipy jugy'ajt comeen'ajt jim Egipto. Com Moisés ti anajty yhuinma'ñypidägy co Dios yega'ñ je oybi. 27 Mïd co Moisés mibicy anajty Dios paady choñ jim Egipto, ni catzigïy co anajty rey yjotmädy, jadu'n y'ijty tudägy nej jihuiy ixy je Dios ca'pi yaj'ixy.

28 Mïd co mibijcy Dios paady Moisés tuuñ je

pascuaxi, chi ni'ane'mdiy co huen tijc'aguu tüg tüg yajni'pyi, jigix co je ángel huidibi yaj'öcp, ca'p je' je israelitajäy y'ungoob yaj'o'cipy. ²⁹ Miid co ajcxy mibijcy Dios paady je israelitas ajcxy yajnajxy je tzaptz mejy jadu'n nej jihuïy ñajxcixy huindïztuuy, e co ajcxy je Egipto jäy nañ jadu'n yjanaxa, cijx ajcxy ñi'o'ctäy.

³⁰ Miid co ajcxy mibijcy Dios, paady ycidäday je poch ma je Jericógajp, taab anajty je israelitas ajcxy ti jühuidijtcixy huixtuyc xi. ³¹ Miid co Rahab, je töxyjäy jibic tzinaaybi, mibijcy Dios, paady ca' y'o'cy quipxyi miid je huidibi anajty ca' capxymidoogixy Dios. Com co je' yajjättacy ma ytiycin je huidibi anajty ti choongixy ma Israel jäy ajcxy anajty yajpaady, co anajty ayüch ameech yajciyögixy yajtecyyögixy Canaán naaxjot.

³² ¿Ti njacmiydägibich? Nyajtigoy'idaamybich tiempo co nimiydägibich Gedeón, Barac, Sansón, Jefté, David, Samuel, e jacjadyii Dios y'ayucnajtzcaxiibi. ³³⁻³⁴ Miid co ajcxy mibijcy Dios, paady ymimadac ajcxy ymidzip canaag picy, ane'my ajcxy yajxon yi cajpjäy, ypaat ajcxy pubejtin huidibi Dios anajty ti yaj'ahuaniiygixy. Yaj'adujc ajcxy caa y'ahuac, yajxeem ajcxy jün huidi anajty ooy ymijity, tzooc ajcxy co anajty yaj'ögaangixy miid espada. Pinjaty anajty pumäyip ypaat je' ajcxy ymic'ajt ymijaa, mij je' ajcxy ooy y'ijtcixni ma chiptungixy, e ymimadactay ajcxy maymidzip. ³⁵ Jim anajty töxyjäy yjajtigixy huidibi ajcxy cidigiiyi y'ung juugy huidibi anajty ti jugypicy co anajty ti y'ögy. Jadyii ajcxy y'o'cy ahuoni' agidzi', ca'p ajcxy paty nïdzoocin. Jadu'n

ajcxy paty o'cin, jaydēbi patcixy jugy'ajtin etz tzinaayim jac'oybi ma Dios. ³⁶ Jadyii Dios y'ayucnajtzcaxiibī ooy ñixiici yajxiici, yajcī'ajty, etz tzumy mach ypujxtijc'iñāy. ³⁷ Jadyii Dios y'ayucnajtzcaxiibī y'o'cy ajcxy tzaagögäch, jadyii yaj'ajidiy ajcxy janch tim cup y'ijxmajtzi ajcxy, jadyii yaj'o'ci mīd espada. Ymiñ xyijpy xii yaa yhuidiitcixy ymīd ajcxy ñinīcx yūch mīd cōbixy'ac etz mīd chivo'ac, ayoob jāy ajcxy, jotmay mīd, yajtzaachtungixy yajca'oydungixy. ³⁸ Yi jadu'mbi Dios y'ayucnajtzcaxiibī ajcxy ni je naaxhuiñyājāy anajty camihuaadity. Mīd ymidzip pahuidijtciy, paady yhuidiitcixy anajty titznaaxtuum etz yuugjoty, chinaaygixy naaxpa'tci'py etz majaty ang. ³⁹ Nidüg'óciy je' ajcxy oy cōmay ajcxy yjanajxy mīd co mībijcy ajcxy Dios, ca' ajcxy paty tiibi anajty Dios y'ahuanīy. ⁴⁰ Com Dios jac'oybi je' anajty yegamyb mīd ich ajt, paady ca' ajcxy paty je oybi tiibi Dios y'ahuanīy. Ti anajty Dios nihuinmayīy co yajca'pxaani yi' ajcxy ytudägy'ajtin quipxyi mīd ich ajt co Cristo y'o'cy mīd ich ajt nbocy ycixpi.

12

Tzoc ich ajt nhuinma'ñybiidaacim ma Jesús

¹ Com nmīd'ajtim canaag iixpejt nej jāy jecy'ajty mībijcy Dios, paady ich ajt jadu'n nipaady nej jihuīy huinduy jajixci'py nmīd'ajtim jāy huidibi ti yajniguēxīgy ymībijcin. Paady ycixp tzoc ahuing pīdaacim je huīdijaty xy'adzippim ma ajt nmībijcin, e nañ jadu'n tzoc ahuing pīdaacim je pocy huīdibi xyajhuinma'ñydiigooyim,

e tzoc naymic'ijxim cuydunim yi tiy'ajt miid mecxtujcin ma ajt ndzinaayin, jadu'n nej jäy ñaymic'ijxigixy co nayboyicquípxigixy. ² Tzoc nhuinma'ñybidaacim ma Jesús. Jim iixpejt nbaatim ma Jesús nej jēbi nmibijcin Dios. Jesús yi' je' ti xyajnejhuüyim Dios ytiy'ajt. Yi Jesús yi' y'ayoo anajty ma je cruudz, ni ca' yi' tuñcuendi je jadu'mbi o'cin oymidzo'yduunip. Com co Jesús ñejhuüyb anajty co jadu'n y'oc'ayoohuipy, chi ypaadipy jotcuyc'ajtin ma Dios y'ane'my. E cham je' yajpaady ma Dios ymijc ma Dios y'ane'mdac.

³ Huinmaaygixy miich ajcxy je Jesús y'ijxpejt, nej pocyjäydijc chaachytuungixy etz ñi'ojüygixy, etz ca' y'ixaani, paady ca' mdzjpcigixy ni mgamijotmetzcüygixy. ⁴ Ca'ni miich ajcxy ayo'n tzaachypí myajnaxy mabaad ni'py ajcxy mxibidyii jadu'n nej Cristo yjajty. ⁵ ¿Nej ti miich ajcxy mjäy digooygixy je capxhuijin huidibi Dios ti xymooygixy nej jihuüy yci'm'ung? Jadu'n ymina'ñ ma Dios ñecy:

Miich n'ungich, ca' mbidägy nej jihuüy ca' ytim ytiijity je tzaachypí huidibi Dios miid xycapxhuijy, ni ca' mjotmetzcühuipy co xyaj'óipy.

⁶ Dios ycapxhuijpy yi' pinjaty chojcpy yjihuiyb. Dios chaachytumby yi' ajcxy co ytundigooy, pinjaty yi' ti cöbicy nej jihuüy yci'm'ung.

⁷ Mímadaaccix miich ajcxy je castigo, com Dios jadu'n yi' xymidity ajcxy nej jihuüy yci'm'ung. ¿Nej ji jada' tüg ung, e ca' yteedy chaachytunüyb co ytundigooy? ⁸ Pen ca' miich ajcxy Dios ti tzaachypí xymooygixy, jadu'n nej yi' moy

castigo tög'ócıy y'ungdıjc y'anäctıjc, ca' miich
ixıpyı ajcxy Dios xy'ung'adyii tıydudägy. Jadu'n
miich ajcxy m'idıpy nej tög pi'c'anäg hııdıbi
yteedy ca' y'ıxa'ñyii. ⁹ Jadög nax, taabi anajty ajt
nbi'cnıty, ııch ajt ndeedy ya naaxhuiñ xy'ııhuijim
xycapxhuijim anajty, e xychaachytuunım co
ca' ngapxymıdoohuım nhuındzıgııyım ajcxy.
¿Nej co ca' huaad n'ıjtim ane'my ma ajt ndeedy
hııdıbi tzejpjoty yajpatp? E jadu'n jėbi nbaatım je
jugy'ajtin hııdıbi ca' ycıxıpy ytıgoyıpy nimına.
¹⁰ ııch ajt ndeedy ya naaxhuiñ xy'ııhuijim
xycapxhuijim anajty mııd jada conbi jugy'ajt
ycıxpi, jadu'n nej je' anajty ajcxy oy'ıxy. Nañ
jadu'n Dios ııch ajt xychaachytuunım mııd ajt
n'oy'ajt ycıxpi etz jigıx nmııd'ajtim huädz jot huädz
huınma'ñ nej Dios ymııdıty huädz yjot huädz
yhuınma'ñ. ¹¹ Oy yjanchıty co ca' ti tzaachypi
ndzojcm ma yam nbaatım je tzaachypi, com
ooy ndzachjihııyım je tzaachypi, e ca' jotcuıjc
nayjihııyım. Per pııjaty ıxpııcpı Dios chojcm mııd
je tzaachypi ycıxpi, chi je' yhuımbıdzımıygıxy tög
jugy'ajtin tädägyı etz jotcuıcpı.

*Je hııdıbi ayo'ngojp co Dios y'ayuc
ngacöbıgaanım*

¹² Paady miich ajcxy jotmııcpııccıx ma
mmııbjcm, jadu'n nıpaadıp nej jıııy
myajpıdıccıxy mgı' tııbi y'anucııyñı, etz
mgoxcohıııjc mııc'ajt paady hııdıbi anajty ca'
mııc'ajt mııdıty. ¹³ İxtaaygıx nıı'aa tıı'aa tııybi ma
mdzınaayın, jadu'n nıpaadıp nej jıııy yı mdecy
hııdıbi mädıp ti chögy, e camına jadög'oc yhuııdıp.

14 Tzinaaygix mïd oyjot oyhuinma'ñ mïd nidüg'óciy jây. Ca' mdúngixipy ti tzip. Mïd'ajtcix tüg tzinaayin huätzpi, pen ca' jadu'n mdungixy, ni pin ca'ixipy je Huindzin Jesucristo. 15 Ooy cuenditungixp co ni pin cajipyöydüdiy je pubejtin huidibi Dios ti ahuanïy, jigix nañ jadu'n ni pin ycayajpaadipy janch mät yjot yhuinmañ, e yajhuindigoydäy yajmättäy jacjadyii ymigügtijc, tim jadu'n nej tüg ujtz ta'mbi ypa'mduñ. 16 Ni tüg miich ajcxy ca' huaad ti ayuc mïd'aty mïd huingbi töxyjäy huidibi ca' miich mdöxyijc'adyii. Ca' nañ jadu'n m'ixtijipy je ayuc huidibi Dios yajhui'my mïd miich ajcxy ycixpi, jadu'n nej y'idüch Esaú. Mïd tüg caayin uucin Esaú toocnax je huidibi anajty möhuaanip yteedy co y'unggoobity. 17 Miich ajcxy mnejhuïyb co Esaú tocy huidi anajty paatip co japada'ñ je conuucxin huidibi anajty yteedy möhuaanip, ca' jadu'n Dios cöbijcy, chi Esaú ooy yjayaaxni, per ca' anajty ñihuinma'ñ nej yjothuimbidip mïd je' ycixpi tiibi anajty tuñ.

18 Ca' miich ajcxy ti mjaty ti m'ixy, nej jecy'ajty yi israelitas ajcxy yjajty etz y'ixy co ajcxy mihuingoñ je cop Sinaí ma anajty Dios ti pidägy mij jin, ma anajty ooy yhuidezucy yjidity etz mijpoj mijtigoy ñaxy, ma anajty ooy y'agoodziy anaxy. 19 Ni mgamidoy ajcxy je trompeta ni je Dios y'ayuc huidibi anajty ajcxy je' migapxip. Pinjaty je' midou je ayuc ypijctzou ajcxy may'ajt co ca' huaad yjacmigápxigixy com ooy anajty chigiiygixy. 20 Je' je' anajty ycixpi co anajty ca' mimadägaangixy je ane'min cötujcin huidibi anajty minamb: "Pin anajty ytecy pidacp ma yi cop, hue' yi' y'oyyaj'o'cnity

cögäch mïd tzaa o mïd quipyjïpxu'ñ, oy ixypy y'iyujcity.” ²¹ Oy chigïyñi huidibi anajty yaj'ïjxp, Moisés ci'm minaan: “Tziyuuybich yam mïd tzigï'ñ.”

²² Per miich ajcxy jadu'n nipaady nej jihuïy ti mmïhuingoongïxy yi cop huidibi yxï Siôn etz je Dios juugypï ycajp. Je' je' je Jerusalén tzajpjotypi ma canaag mil je ángeles ajcxy yöymujccïxy. ²³ Ti miich ajcxy mmïhuingoongïxy ma ti yöymujccïxy je jaccömaaybi jäy huidibi ajcxy yxï cojaay ma Dios ñecy jiiby tzajpjoty, je huidibi ajcxy huin'ïb huin-gapxtacp Dios. Ti miich ajcxy mïhuingoongïxy Dios je huidibi nijuez'ajtp tüg'óciy. Nañ jadu'n ti miich ajcxy mïhuingoongïxy je' ajcxy je oyjäydïc y'espíritu huidibi Dios ti yaj'ahuimbijttäy tudägy. ²⁴ Miich ajcxy ti mïhuingoñ yi Jesús, yi huidibi xy-codinaayim ma Dios mïd je jemybi cötujcin huidibi Dios yajhui'my mïd ïch ajt ycïxpi. Yi Jesús huidibi mic'ajtmoy je Dios y'ayuc jemybi, co ñi'py teemy yojcy mïd ajt nbocy ycïxpi. Yi Jesús co ci'm ñi'py teemy yojcy mïd jäy ajcxy ypocy ycïxpi, ñigï oy yi' ca'ydi co Abel iyujc ñi'py teemy yojcy mïd ypocy ycïxpi.

²⁵ Paady ycïxp ooy cuenditungix miich ajcxy, ca'ydi yaj'ixtijy Dios, je pïn ti xyajmihui'mim jemybi y'ayuc. Je jäy ajcxy huidibi tzïnay jecy'ajty, ca'p je' ajcxy chocy co ajcxy ixtijy Dios co jecy'ajty yjamigapxi ajcxy ya naaxhuiñ. O'ctïy ïch ajt ca'ndzoocim, pen nmooyim ajt njïx je Dios, je pïn y'ayuc xyajmihui'mim huidi tzoon tzajpjoty.

²⁶ Co Dios y'ayuc yejcy jecy'ajty, chi yajtziyuuy ooy naax. Jadachambi Dios

ymina'ñ: “Jadügtecypajc nyajtziyuya'ñich je naax, e ca' nmīnaanīm naaxti'ajty, nañ jadu'n nyajtziyuya'ñich je tzajp.” ²⁷ Co jadu'n Dios ymina'ñ: “Jadügtecypajc nyajtziyuya'ñich je naax.” Hue' yajhuinjihuīy co ytigoydāhuīpy huiɖijaty yūcxp huiɖibi Dios yaj'oyīy, e je' hui'mīp je huiɖijaty ca' yu'cxy. ²⁸ Paady je Jesucristo ycōtujcīn huiɖibi Dios xyajmīhui'mīm, ca' yi' huaad ytigoy. Tzoc yajnaxīm Dioscojuyip mīd Jesús y'ayuc ycīxpi, e nyajmī'ajtim n'ojadaajtim Dios mīd tudāgy'ajt etz mīd huindzīgī'ñ nej je' jāygidāgyīn. ²⁹ Ĥich ajt nDios jadu'n yi' nej tūg jīn huiɖibi nōctaayb tūg'óciy.

13

Nej jēbi nyajjāygidāacīm Dios

¹ Miich ajcxy huiɖibi mībijcp Jesucristo, ca' mājyɖigooygīxy co ajcxy mnaychójcīgixīpy mīñ xyīpy nej jihuīy ajcxy mdūgquēxyīty. ² Ca' ajcxy mājyɖigóoygixīpy co oyjāy'ajtin mdūngixīpy mīd pīnjaty ajcxy xycojādīyb. Mīd co oyjāy'ajtin ajcxy tuuñ, chi nijējity ajcxy yajjāttacy ángeles ajcxy, ni ca' ajcxy huinjihuīy co ángeles anajty ti ya-jjāttaaccīxy.

³ Mjāymedzip ajcxy pīnjaty tzumy'iñāayb mach'iñāayb jadu'n nej jihuīy miich ajcxy nañ jadu'n mdzumy'iñāaygīxy mmach'iñāaygīxy quīpxy mīd je' ajcxy. Jāymedzip miich ajcxy pīnjaty tzaachypī ayo'n mīnajxp yajnaxp, com nañ jadu'n miich ajcxy mīɖity je nīnīcx huiɖibi jēbi y'ayoy.

4 Huen nidüg'óciy jäy huindzig'iygixy yajmij'ajtcixy je pijcin casada'ajtin. Huen je yëydijc etz je ytöxyijc naymüdtzináayigixy yajxon, com Dios yi' tzaachytunipy pinjaty tundigooyb müd huingbi töxyjäy.

5 Ca' m'adzojccixy meen. Mijotcuje'ajtcixy ti ajcxy ii müd. Dios ti je' ymina'n: "Camina xii ich miich ajcxy n'ixmadzipy, ni ich miich ajcxy ngajäydgoyipy." 6 Jadu'n jëbi nminaanim agujc jotcuje: "Yi Huindzin Dios yi' xypubejtpich, ca' ndzigihua'nich jäy nej xyjatuna'nich."

7 Jäymejtcix miich ajcxy je pinjaty ti xyñigohuajc'ajtcixy, je pinjaty ti xyajmüdmïydaaccixy Dios y'ayuc ytiy'ajt. Huinmaaygix nej je' ajcxy anajty ytuðägy'aty, padungix nej je' anajty ajcxy müdity ymibijcin.

8 Jadu'n nej Jesucristo oybi tuñ jecy'ajty, nañ tim jadu'n oybi tuñ chambaad, etz oybi tuna'n huinixii huinütiempo, ca' yi' yajtigadzip yi yhuinma'n ni mina. 9 Ca' miich ajcxy myajhuin'üngixy müd canaag ixpijcin huidibi ca' ytügnaxity müd Jesucristo ytiy'ajt. Nigi oy co ajt nbidaacim nhuinma'n ma je Dios y'ayuc, nej yi' xychojcin xyjihuiyim, nej yi' may'ajt tuñ müd ich ajt. Ca' mbidaacim mhuinma'n ma je cötujcin huidibi adujcp nijëjity caayin uucín. Ni ti jotcuje'ajt ajcxy capaty pinjaty panixp yi jadu'mbi cötujcin.

10 Je judío tungmüdpï huidibi huindzigi'n tumb anajty ma Dios yhuittijc je jecyip, ca' yi' jëbi yjactuuni ma ich ajt nmibijcin jadu'n nej Jesucristo tuñ huindzigi'n müd ich ajt ycixpi. 11 Je judío mïjtungmüdpï ma Dios ytiyc ypidac iyujc

ñi'py ma je Lugar Santísimo nej tüg huindzigi'ñ huidibi yajpocyñihuaatzp je mayjäy. Je iyujc ögy ñinix jiguem je' yajnögy, ca' jibiyity cajpjoty ma je Dios anajty huindzigi'nygyxy. ¹² Tim jadu'n nej je judío sacerdote yajnögy je huindzigi'ñ iyujc ñinix cajp ñinaxy, nañ tim jadu'n Jesús paty tzaachy'o'cin cajp ñinaxy jigix mäd je' yci'mni'py pocyñihuaädzip je mayjäy. ¹³ Tzoc mijpidaacim je Jesús tiibi y'ögy cajp ñinaxy mäd ich ajt nbocy ycixpi. Tzoc minajxim yajnajxim je canayyajmij'adi je canay'ixa'ni, tim jadu'n nej Jesús minajx yajnajx je canayyajmij'adi je canay'ixa'ni. ¹⁴ Ya naaxhuiñ ca' ya ajt nmädity tüg ciudad ma jëbi n'ijtim huinixi huinitempo, je' ich ajt nijp'ijxim je tzinaayin huidibi miimb cidaacp. ¹⁵ Paady ycixp chojcpy co Dios n'ojadajtim nmibijctzoohuim jabom jabom huinixi mäd Jesucristo yxi. Co jadu'n n'ojadajtim nmibijctzoohuim Dios jadu'n nipaady nej tüg huindzigi'ñ nmooyim. Tzoc ii mibijctzoohuim, tzoc ojadajtim mäd ajt ngi'm'ahuac ngi'm'ayuc. ¹⁶ Ca' mjäy digóoygixipy co oybi mdúngixipy etz naybubéjtigix naybudigíyigix miñ xyipy. Co jadu'n mdúngixipy jadu'n nipaady nej tüg huindzigi'ñ ti myejccixy ma Dios huidibi yi' ooy jäygidägy.

¹⁷ Capxymidoogix pinjaty xyñigohuajc'ajtcixp etz yajmij'ajtcixp, com yi' miich ajcxy xycuend'ajtip yi' m'alma. Nejhuíyim co ciyegaangixy ycuendi ma Dios nej ajcxy ti xycuend'aty. Pen oybi miich ajcxy mdumyb mäd yi' ajcxy, jotcuje ajcxy ñayjihuíhuib. Pen jibic miich ajcxy mduñ mäd yi' ajcxy, tajip mayip ajcxy. E pen yi' ajcxy

tajp maayb, chi miich ajcxy ca' ni ti jotcujc'ajt mmïd'adïpy.

¹⁸ Mibijctzoogix Dios mïd ïch ycixpi etz je pinjaty xymïdhuïdijtpich. Jatytim naymic'ïjxibich tudägy nduunïch ma tüg'óciy ïch ndung, paady ycixp jotcujc nayjihuiyïijich. ¹⁹ May'ajt nbijctzooybich ma miich ajcxy co Dios mmïbijctzoogix mïd ïch ycixpi, jigix Dios a'ixihuipy co nïcxibich tzojc ma miich ajcxy.

Oy'ajt etz capxpooxcïn huïdibi cogixïyñip je necy

²⁰ Dios nmïbijctzooybich mïd miich ajcxy ycixpi. Je Dios huïdibi yajjugypïjc jadüg'oc ïch ajt nHuïndzin Jesucristo co y'o'cy, je huïdibi cuend'ajtp je maymïbijcpïdïjc. Co Jesucristo ñi'py teemy yojcy, chi mic'ajt moy je jemybi cõtujcïn huïdibi Dios ti xyajmihui'mim. Dios ti pidägy Jesucristo jadu'n nej je cuend'ajtpi jac'oybi ma je maymïbijcpïdïjc. Jadu'n yi' nipaady nej tüg cöbixy cuend'ajtpi huïdibi cuend'ajtp may ngöbixy. ²¹ Je Dios huïdibi xyajjotcujc'ajtim je' huen xyaj'ahuimbijtcïxy huädz etz oyjäy ma tüg'óciy ajcxy mmïbijcïn etz ma tüg'óciy ajcxy mdzinaayïn, jigix ajcxy mdunïpy nej yi' tzocy. Dios huen tuñ ma ïch ajt njot nhuinma'ñ mïd Cristo ymic'ajt nej yi' tzocy. ¡Huen Cristo y'idïpy mij cömay huinixï huinitioempo! Amén. Jadu'n jada.

²² Nmïgügtïjc, nbijctzooybich may'ajt yajtungïxy mecxtujcïn ma jada ayuc capxhuijïn. Ti ajcxy ii con nijayïygixy. ²³ Nejhuïygix miich ajcxy co ajt nmïgüg Timoteo y'ity ahuätztuum. Pen tzojc yjädy

ya ma nyajpaadyich, chi yi' xymiidnícxibich co ñich
anajty miich ajcxy nícxy n'ijxcixy.

²⁴ Nguejxpyich ngapxpoocxin ma nidüg'óciy pin
ajcxy xyñigohuajc'ajtp etz je migügtijc ajcxy huídibi
mibijccixyp. Je migügtijc huídibi ajcxy yajpatp ya
Italia yquejxyp ajcxy capxpoocxin ma miich ajcxy.

²⁵ Dios ajcxy xyconuucxip nidüg'óciy miich
ajcxy. Amén. Jadu'n jada.

El Nuevo Testamento en mixe de Coatlán **New Testament in Mixe, Coatlán (MX:mco:Mixe,** **Coatlán)**

copyright © 1976 Wycliffe Bible Translators, Inc.

Language: Coatlán Mixe (Mixe, Coatlán)

Translation by: Wycliffe Bible Translators, Inc.

Mixe, Coatlán [mco], Mexico

Copyright Information

© 1976, Wycliffe Bible Translators, Inc.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Mixe, Coatlán

© 1976, Wycliffe Bible Translators, Inc.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2018-11-16

PDF generated using Haiola and XeLaTeX on 11 Nov 2022 from source files
dated 29 Jan 2022

4190de74-18ab-52cf-ba4e-5f99ab05892f